

صَبَاتُكُمْ بِلَا وَجَعٍ



الكتاب : صباحكم بلا وجع

الكاتب : عمرو محمد مرزوق

تصميم الغلاف : محمد محسن

تنسيق داخلي : يوسف الفرماوي

مراجعة لغوية : د/ ميرفت صلاح

الطبعة : الأولى ٢٠٢٠

رقم الإيداع: 2019/23486

الترقيم الدولي: 978-977-6727-94-6

الناشر : السعيد للنشر والتوزيع

المدير العام : لمياء السعيد

برج الهادي - الدور الأول - 36 ش عبد الحميد الديب - شبرا مصر

0222017260 – 01550096215

elsaidpublisher@gmail.com

جميع الحقوق محفوظة للناشر

صَبَاتُكُمْ بِلَا وَجَعٍ

تأليف

عمرو مرزوق



إلى من يفيضون حُبًا
بلا حبيبٍ و لا محبوب ،
شغفًا بالحب فقط
سلامًا عليكم أينما كنتم وكيفما كنتم ...

تفاصيلنا الصغيرة..

لكل منا طقوسه وتفاصيله الصغيرة التي قد لا ينتبه إليها أحد ، وقد
لا ننتبه نحن أيضًا إليها
تفاصيل تجعلنا نشعر بالسعادة مهما كانت صعوبة الحياة وقسوة
الظروف

فالبعض قد يستعجل في إختيار نوع القهوة التي سيشربها ووقتها،
ويختار ملابسه بسرعة، وقد يهمل التأمل في أشياء تسعده ..
وربما تجاوز عن قراءة كتابا أعجبه بحجة الوقت ،ويظل يهمل تلك
التفاصيل الصغيرة إعتقاداً منه بأنها غير مهمة ، حتى تأخذ من وقتنا
وتفكيرنا، ولا يعلم أنها تتراكم لتصنع أجمل الأشياء في حياتنا..
قرأت ذات مرة لأحدهم يقول :

(يا بُنيّ، لا تشرب قهوتك في عجلة، ولا تستمع لأغنيتك المفضلة بصوت
منخفض، ولا توقف فيلمك في منتصفه مهما كانت الأسباب)
يا صديقي....تمسك بطقوسك الصغيرة ، مارسها بكل ما أوتيت من
شغف ، تلك الطقوس التي يعتقد الآخرون بأنها تافهة تشكل حياتك
و تملأ نبضك،لا تنتظر قدوم الأشياء الكبيرة لتستمتع بها، بل استمتع
بجمال الأشياء الصغيرة واهتم بتفاصيلها وأحرص على جمال كل شئ
يدخل حياتك ، مهما كان بمنتهى البساطة والصغر..
فالسعادة غالبًا ما تكمن في التفاصيل الصغيرة التي لا ينتبه إليها
أحد.

الحلم الاجمل في حياتك أن تلتقي بمن تري في عينيه حقيقتك دون أي

رتوش

أن تلتقي بمن لاتخجل أمامه من أن تخلع جميع الاقنعة

من يفهم صمتك قبل أن يفهم كلماتك ..

من يشعر بوجعك قبل أن تتن أو تشكو..

من يري جنته في عينيك..

من ينزف ألما لجرحك.. ويحلق فرحا لابتسامتك..

والحقيقة الاجمل أن تمسك بيديه فلا تفلتتهما..

لتذهب ارواحكم في عناق طويل يحو ماخلفه الزمن ليسطر تلك

الحقيقة بمداد من عشق ..

الغيرة في الحب لما بتتحول لحب تملك بتبقي قيد بيخنق الحب
ويقتله.

فالحب مش تملك وأنانية بالعكس الحب حرية ..

الحب إنك تحس إن مفيش قيد يربط قلبك..

وإنك عامل زي الطير الحر اللي بيطير ويحلق في السما..

يدور ويلف لكن قلبه بيرجع في الآخر لحضن وليفه اللي بيحس فيه
بدفا الوطن بعد برد الغربة..

الحب إنك تتقلب بين الوجوه والقلوب لكن في الآخر فيه وجه واحد
وقلب واحد

هما الواحة اللي بتستخبى فيها من قسوة العالم وجفافه .

مش معني كده إنك ما تغيرش على اللي بتحبه بالعكس..

الغيرة هي قطرات الندى التي يرتشف منها الحب ليزيد توهجًا ..

لكن الغيرة المبالغ فيها نار بتلتهم الحب ..

عشان كده أحسن وصف للغيرة هو وصف أم كلثوم لما قالت (أغير
عليك من اللي يحبك أكثر مني)

عبارة لخصت كل المعاني ..

لأن لو فيه حد بيحب حبيبك أكثر منك.. بيحتويه أكثر منك.. بيحسسه
بالأمان أكثر منك ..

يبقي حبك ناقص مبتور ..

ووقتها تبقي محتاج تسأل نفسك أنت فعلاً أنت بتحبه بجد ولا لأ..

تستحقه ولا لأ

النظرة الأخيرة هي ما يعلق في العقل والقلب ..
إنها المراسم الأخيرة في وداع ما أحببناه ..
تلك المراسم التي نهرب منها أحيانا لتبقى الأشياء والأشخاص تنبض
بالحياة داخلنا..

إنها النبضة التي تبقى لتوخز القلب بنصل الحنين ..
هي تلك الكلمات الأخيرة التي تحمل بين طياتها أصدق وأرق المشاعر

..

التي جاهدت كثيرا لتتوارى وتختبئ ولكنها إستسلمت أخيراً ...
لتنساب على إستحياء عند الوداع ..
وكأنها تصطحب معها جزء من تلك الروح التي تأبى أن تفارق مَنْ
سكنها يوماً..

هي إنكسار النفس أمام إحساس العجز عن إستبقاء من حان وقت
رحيله ..

هي تلك الدمعة الحارة التي تترقرق محطمة كل القيود وهي تتضرع
إلى بارئها قائله :

«رباه إني أستودعك إياهم .. فأجعلهم في ودائعك»

الحب مش كلمتين حلويين وخروجة حلوة ومكالمات ليل و نهار وصبح
وعشا وطول الوقت ..

والجواز مش فستان أبيض وبدلة شيك في مكان غالي وناس تهيص
وترقص حوالينا

الحب هو إنجذاب روح لروح لاقت فيها اللي يكملها ويغنيها عن
العالم

الحب هو إهتمام ورعاية وعطاء وإحساسك بالأمان مع الإنسان اللي
إخترت تسكنه قلبك..

الحب ممكن يكون مقدمة وسبب للجواز لكن برده عمره ما كان
كافي لنجاحه..

عشان كده ناس كتير أوي كانوا ولا زالوا بيحبوا بعض كانت نهاية
جوازهم الانفصال بالرغم من وجود الحب..

عارفين ليه..؟

لإنهم ما فهموش إن الزواج مودة ورحمة زى ما ذكر ربنا في كتابه..
أيوه الحب مجرد بداية لازم تكمل بالمودة والرحمة لأن الحب لوحده
مش كفاية..

ولأن المودة مفهوم أعمق وأقوى من الحب بكثير ، وخاصة لما بتمتزج
بالرحمة ..

الحب ممكن يأذي أحياناً ، ومن الحب ما قتل.. لكن المودة عمرها
ما تأذي لأنها تجملت بالرحمة

عشان كده ربنا قال « وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا
لِتَسْكُنُوا إِلَيْهَا وَجَعَلَ بَيْنَكُمْ مَوَدَّةً وَرَحْمَةً »

ربنا قال من أنفسكم مقالش منكم ، لأن الإثنين بيققوا نفس واحدة
وروح واحدة ومفيش حد بيأذي نفسه ولا بيجرح روحه..

وكمات قال لتسكنوا إليها مش معها لإن كل واحد فيهم بيققى هو

السكن والأمان للتانى اللي بيغنيه عن الدنيا كلها واللى بيلجأ له
عشان يستخبي جواه من قسوة الأيام ووحشتها ..
عشان كده إختاروا اللى تحبوه ويحبكم ويكون بينكم مودة ورحمة ..
إختاروا اللي يكون لكم سكن وتحسوا معاه بالأمان.. اللي يكمل
معاكم ويستحملكم في أوقات ضعفكم وحاجتكم ..
الى يحبكم وتفضلوا في عينه حب العمر حتي لو كنتم في أسوأ
حالتكم..

إبعدوا عن اللي يستنزفكم ويستنزف مشاعركم وعمركم بأنانيته..
الي بياخذ من رصيد أيامكم وأعماركم ويحول حياتكم لأطلال وذكرى..

التعلق مرض قاتل ...
لما بيصيب حد فينا بيخليه عاجز ..
بيحس بالغربة حتى وهو بين الناس ..
بيخليه يفقد لذة الحياة ويفقد حتى الإحساس بيها لمجرد فقدانه
لحد قريب منه .. حد إتعلق بيه..
حتى ولو كان ده لبرهة من الزمن .. بس بتكون كافية إنه يحس إن
الزمن فيها متوقف ..
الحياة من غيره بتبقى من غير معنى ..
كل حاجة بتفقد قيمتها وبريقها ، حتى الألوان بتتساوى في نظره
بيحس أن تفكيره في أى شئ سواه مسلوب ..
حتى الكلمات في غيابه بتفقد معناها ..
ويفضل دايماً عايش على الإنتظار ...
منتظر كلمة .. رسالة .. مكاملة ..
بيفضل عايش في حرب بيخوضها جوه نفسه عشان بس يقنعها إنه
لسه مهم في قلب اللي بيحبه ..
وبيفضل سؤال حيران يدور جواه ..
يا ترى اللي غاب هيرجع تانى ..؟
ولا الغياب هيتلعه وينساه ..؟
يا ترى كان شايفه شئ عابر في حياته ..؟
ولا هو عايش نفس إحساسه ..؟

دائمًا الناس من بعيد أحلى
ودائمًا البدايات أحلى ..
والكلام في الأول أحلى ..
بس لما بنقرب بزيادة كل حاجة بتتغير ..
الصورة بتختلف تمامًا ..
يمكن لأننا لما بنقرب بنشوف الحقيقة اللي بتعمينا عنها مشاعر
الإنجذاب اللي بتكون في الأول ..
لما بنقرب بنشوف العيوب زى ما شفنا المميزات ..
صحيح ما فيش حد بيبقى خالى من العيوب والأخطاء ..
لكن المهم إحنا هنتقبل العيوب ديه زى ما تقبلنا المميزات ولا لأ ..
هنقدر نتكيف ونتعايش معاها ولا لأ ..
أوعوا تخذعكم روعة البدايات وجمالها ..
صحيح جمال المشاعر فى بدايتها ...
لكن دائمًا صدقها ببيان لما بتختبرها الحياة والظروف ..
عشان كده حافظوا على مشاعركم وما تبدلوهاش كلها فى البداية ..
لغاية ما تقدرؤا تتأكدوا من صدقها ومن صدق مشاعر الآخر ..

تفتكروا اللى بيحب ممكن فى يوم يقرر يبعد..
ممكن فى يوم يقرر ينهى علاقته باللى بيحبه بسهولة ..
اللى بيحب مستحيل يبعد بإرادته مهما كانت الصوبات اللى بتواجهه
مهما كانت الظروف أو الأسباب اللى بتدفعه للبعد..
عارفين ليه ؟..
إن البعد عامل زى حكم بالموت وإنت عايش..
بتبقى عامل زى ما تكون روحك مسلوبة معلقة باللى بتحبه ..
وبعده عنها بيعذبه بلا رحمة ..
بيبقى عايش جسد من غير روح ..
بيتمنى فى كل لحظة لو ينتزع قلبه من صدره عشان يرتاح
حتى صوت نبضاته بيعذبه ويفكره فى كل لحظة بيعشها ..
بكل كلمة .. بكل ضحكة .. بكل همسة .. بكل دمعة ..
بيحس إن اللى عايش مع الناس ده حد تانى غيره ..
أما هو فيكون فى عالم تانى مع رفيق روحه ..
بيشوف فى كل الوجوه وجه حبيبه .. وبيسمع فى كل الأصوات صوته
وبس ..
بينسى أسامى الناس عشان يفتكر إسم واحد ممكن ينادى بيه على
اللى حواليه من غير ما يحس
بإختصار بتمر عليه الحياة صعبة .. ثقيلة .. مالهاش معنى من غير
اللى بيحبه..
تفتكروا بعد كل ده فيه حد بيحب بجد ممكن يفارق أو يبعد بإرادته
..
مهما كانت الأسباب....

أحياناً بنشتاق لبيوتنا القديمة ..
لذكرياتها الى مش بتتنسى .. ريحتها .. ناسها الطيبين ..
بنشتاق لأرواحنا البريئة وملامحنا الطيبة قبل ما تأثر فينا الدنيا وتغير
ملامحنا ..
أحياناً بنزج ندور على نفسنا الى نسيناها في زوايا ماضى يابى
الرجوع ..
أحياناً بنشتاق لأحبة فارقتهم طوعاً أو كرهاً
لطفولة بريئة كنا بنعيشها في سعادة من غير ما نحس وإحنا بنتساءل
في براءة كل يوم ..
إمتى نكبر ؟..
لأول إحساس دق القلب النقى ..
لنفسنا قبل ما الدنيا تغيرنا وتبدلنا
وفي وسط ده كله نقف عشان نسأل نفسنا ..
يا ترى ممكن نعيش الأحاسيس ديه تانى بنفس جمالها ورونقها الأول
؟..

من منا لا يتمنى نهاية مسالمة .. لاجزع فيها .. لا صراخ .. لا ألم.. فقط

سلام .. رضا .. سكينه

لا يتحقق ذلك إلا حينما نتخلص من عنت تلك الحياة وثقلها.

حينما نتصالح مع أنفسنا ومع غيرنا..

حينما نُرضى الخالق دون أن تعيننا آراء وأقوال الآخرين..

حينما ندرك أن العالم لا يستحق كل هذا العناء والحزن..

يكفيينا من الدنيا لحظات من الصدق نعيشها دون زيف أو تلون..

لحظات نعيش فيها كما نحن بالفعل لا كما يجب أن نكون

أو كما يريدنا الآخرون.

- إنك تتوهمين أنكِ أشقى مخلوقة على الأرض !

لكنك لا تعرفين الشقاء بمعناه الحقيقى ،

أتعرفين ما هو الشقاء يا حبيبتي..؟

- الشقاء..؟

الشقاء أن يحب الرجل إمراة لا تحبه ، لا تشعر به ، لا تشفق لحاله،

لا تحس وجوده !

أن يريد الرجل التضحية بحياته كلها لقاء ابتسامة من حبيبته وهى تنفر منه أو تهرب وتصد ولا تدر بأن صدودها طعنات للقلب الذى

أحبها

الشقاء أن يكون الرجل قويًا ذو كبرياء و جبروت ثم تذله امراة تشعره

بالضعف والهوان أمام فتنة عينيها وسحرها الطاغى و جمال وجهها ...

الشقاء أن يشعر الرجل أنه ضحى بهنائه و سعادته من أجل امراة لا

تقدر قيمته

الشقاء أن ينشطر الرجل إلى عقل و قلب ، العقل يلعن من يخون...

والقلب يعفو و يسامح رغم الألم والعذاب مع من يحب و يَكِن له

الحب العظيم .

(فيكتور هوجو فى رائعته أحذب نوتردام)

كلنا تقريباً بنمر بمرحلة غريبة جداً..
مرحلة الفتور .. مرحلة العادي .. مرحلة السكون .. مرحلة اللامبالاة
في المرحلة ديه بنحس إن كل حاجة بقت عادي .. الإنبهار راح وإنطفى ..
الشغف بأى شئ إختفى ..
حتى الحاجات الصغيرة اللى كانت بتسعدنا بقت عادية ..
مفيش حاجة بقت تستفز المشاعر سواء بالفرح أو بالحزن
على قد ما هي مرحلة مريحة لكنها مؤذية ..
لامبالاة وسكون وحالة من الممش فارقة بتسيطر على القلب والروح بطريقة
بتفقد التوازن ..
ودي بيكون سببها حزمة من الصدمات دمرت كل اللى فاضل من شغف
مبقاش فيه شغف لأي شئ ولا طاقة حتى للكلام
الحل الوحيد للخروج من المرحلة ديه إنك تعيشها كاملة زى ما هي..لإن
الحياة مراحل
وكل مرحلة لازم تاخذ وقتها من غير مبالغة..عشان نقدر نكمل..
بس المهم إنك ما تقفش فيها من غير ما تتحرك..لإنك لو إستمرت فيها كثير
من غير ما تحاول تعديها ..
هتلاقى إن إحساسك بيموت ببطن
ومع الوقت هتلاقى نفسك عايش كإنك جماد .. ما فيش حاجة فارقة معاك
ولا حاجة مآثرة فيك..
عشان كده حاول تدي لكل حاجة حقها في حياتك ..
إدى للحزن حقه .. للغضب .. للفرح ..
إبكي .. إضحك .. زعق .. إصرخ ..
المهم تخرج كل حاجة جواك .. أوعى تسيب جواك إحساس يفضل يعذبك..
عيش الحياة زى ما هي بخلوها ومرها ومراحلها

عندما يؤمن بك أحدهم ..
عندما يضعك في مكانة خاصة ليس بها أحد سواك
فلا تخذله ..
لا تجعله يشعر أنه كان مخطئاً حينما وضعك بتلك المكانة ..
هل تعرف مدى الألم الذى تسببه لشخص آمن بك ..؟
تعلق بك..
هل تعرف ألم الخذلان ..؟
هل تعرف كيف يشعر أحدهم حينما يظل يعطى من قلبه وإحساسه
وروحه
ليجد أن عطائه قد ذهب سدى لمن لا يستحق ..
أن إيمانه بك كان إيماناً بلا أساس ..
إيمان بشئ وهمى لا وجود له إلا فى خياله فقط
لا يحق لك أن تكسر قلباً آمن بك.. وتعلق بك..
ثم تأتى لى تخبره إذهب.. سيعوضك الله ويعوضنى....
هل تعرف شعور ذلك القلب الكسير ...؟
ربما لن تدرك ذلك إلا حينما يعوضه الله لتسقط أنت كسير القلب
فالله سيعوضك بمن يكسر قلبك..
وكما فعلت تماماً سٌيفعل بك ..
فكما تدين تدان ...

هل سبق ورُميت عليك كلمة في وقت كنت فيه بأوج سعادتك ...
وكانت قوية بما فيه الكفاية لأن تطفئك...؟
كلمة واحدة فقط... قد تصعد بك في سماوات الروح
وأخرى قد تهوى بك في مجاهلها ..
هل تدرك كيف لكلمة واحدة أن تبني وأخرى تهدم وتقتل ..
كلمة واحدة قد قيلت ..
أو كلمة لم تقال في حينها ...
كلمة واحدة قد تقال فتكسر قلبًا أو تجرح روحًا دون أن تدري ..
كلمة واحدة قد تصنع حلمًا وقد تقتل آخر..
أو كلمة لم تقال في وقتها فكان الخذلان ..
وحيكت خيوط النهاية للأكثر العلاقات قوة وصدقًا..
يقول الروائي الفرنسي الراحل ألبيير كامو في تقديمه لروايته الشهيرة سوء
تفاهم:
(لو أن كلمة واحدة قد قيلت لما وقعت هذه المأساة)

كان في مرة ملك عامل وليمه كبيرة حضرها أجمل الأميرات..
جندي الحراسة شاف بنت الملك ووقع في حبها على طول لأنها كانت
أجمل أميرة في المكان ..

لكن هيبجي إيه الجندي الغلبان جنب بنت الملك ..
في يوم قدر الجندي إنه يقابل الأميرة وقال لها إنه مايقدرش يعيش
من غيرها..

الأميرة إتاثرت بمشاعر الجندي وقالتله لو إستيتت تحت بلكونتى مائة
يوم وليلة،هاكون ليك إنت..
الجندي فعلاً إستتنى تحت البلكونة في اليوم الأول.. والثاني.. والعاشر..
والعشرين..

وفي كل ليلة لما الأميرة تبص من شبّاكها، الجندي ماكنش بيتحرك..
بالرغم من المطر والعواصف والتلج فضل مكانه زى ما هو..
فضلات الطيور نزلت عليه والنحل لدغه لكن فضل مكانه زى ما هو..
في الليلة التسعين، الجندي أصبح ضعيف جداً والدموع بقت بتنزّل
من عينيه وما بيقدرش يمسكها..
في الليلة التسعة وتسعين .. الجندي قام وقف.. أخذ الكرسي بتاعه..
ومشى بعيد عن المكان..

الجندي ممشيش لأنه هو مش بيحبها أو لأنه مقدرش يكمل..
هو مشى لأنه بيحبها بجد وخاف إنها تكسر قلبه وتخلّف وعدها له
بعد اليوم الأخير ..
مشى لأنه أدرك إنها لو كانت بتحبه بجد زى ما حبها ماكتتش سابتة
يتألم ويعانى..

لإن اللي بيحب بجد ما يقدرش يشوف اللي بيحبه بيتألم أو يتعذب..
وبيبقى مستعد يضحي بحياته عشان سعادة اللي بيحبه..
الى بيحب بجد مايقدرش يشوف اللي بيحبه حزين أو بيعاني بسببه ..

مشى لإن الحب والمشاعر بتتبنى على الثقة..
لإن الحب الحقيقى مش محل إختبار ولا هو حقل تجارب..
مشى لانه أدرك الحقيقة وده أهون وأرحم بكتير من إنه يشوفها
بعينه ويتصدم فيها ..
ناس كتير بتحب بجد وبتستحمل عشان تفضل جنب اللى بتحبه
وتشوفه سعيد ..
الناس ديه مبتقاش عايزة كتير..
لكنها فى المقابل بتدى كتير ..
الناس ديه لما بتتجرح وبتياس بتمشى وعمرها ما بترجع ولا بتبص
وراها تانى..
حتى لو كان قلبها بينزف وبيموت من الفراق..
مش لإنهم ما بيجبوش الطرف التانى ..
لكن لإنهم حبوا بجد وكان جزاء قلوبهم اللى إتملت بالحب إنها
تتكسر وتكسرهم..
حافظوا على قلوبكم..
وإوعوا تفتحوها إلا لى يستاهلها ويحافظ عليها وعليكم ..
لإن إنكسار القلوب والنفوس كسر عمره ما بينجر ولا بيتداوى أبداً..

فيه ناس إتعودت إنها تحافظ على العلاقات فى حياتها سواء كانت حب أو صداقة أو غيره..

الناس ديه بتعمل كل حاجة ممكن تخلى العلاقة تنجح..

بتفضل تدى وتيجى على نفسها وتسامح، وأحياناً بتتغاضى بشأن تحافظ على الناس اللى بتحبهم..

عشان كده الطرف التانى بيتعود على كده،

ويبفتكر إن العطاء والسماح والغفران أبدى

وإن الشخصية ديه هتتغاضى دايمًا عن أخطائه.

ويينسى دايمًا إن لكل شئ حدود

ولكل إنسان طاقة.. عشان كده الناس ديه بيجى عليهم وقتو بيتوقفوا عن كل شئ..

بيطلوا يدوا بدون مقابل.. وبيطلوا يسامحوا اللى بيجرحهم.. وبيطلوا يجوا على نفسهم ويتنازلوا..

ومهما حاول الطرف التانى مايعرفش يرجعهم تانى زى الأول..

عارفين ليه..؟؟؟

لان فيه حاجة كبيرة أوى إتكسرت جواهرهم.. وحاجات أكثر ماتت..

حتى لو حاولوا هما نفسهم يرجعوا زى ما كانوا ويسامحوا مايعرفوش..

لإن كرامتهم وجرحهم ووجعهم وقتها بيبقى أكبر من أى إعتبارات.. أكبر حتى من حبهم ..

الناس ديه مش قاسية ولا جامدة، بالعكس..

الناس ديه أصدق وأجمل ناس ممكن تقابلهم فى حياتك..

لو قابلت فى حياتك الناس ديه حافظ عليهم وماتحاولش تجرحهم..

ما تحاولش تموت الحاجات الجميلة اللى جواهرهم ..

لانهم زى الزجاج لما بيتكسر مايتصلحش،

ولوحاولت تصلحه وتجمعه تانى هيبقى كله شروخ وهيجررك كل ما تمسه..

توم كروز في فيلم جي ري ماغواير كان وكيل لاعبين ناجح..
فجأة قرر إنه يغير أسلوب شغله ويثورعلي الأساليب القديمة .. فالشركة
الى كان شغال فيها طردته..
فقرر إنه يستقل ويبتدى عمل لوحده..
وهو بيغادر الشركة عرض على زميله في الشركة ديه أنهم يروحوا
معاه في عمله الجديد اللي هياأسسه..
واحدة بس هى الى ضحت بالوظيفة وقبلت إنها تبتدى معاه من
الأول..
واحدة بس هى الى كانت مؤمنة بيه وفضلت واقفة جنبه وبتشجعه
بالرغم من ظروفها المادية الصعبة.
واحدة بس هى الى فضلت جنبه للآخر.. لكنه كدّب قلبه وإتخلى
عنها..
بس لما نجح ما قدرش يحس بالنجاح من غيرها..
عشان كده كانت أول واحدة يجرى عليها عشان يقولها إنه بيحبها
وإنها بتكلمه ..
بس هي قاطعته وقالتله إنها بتحبه من أول كلمة (مرحبًا) يعني من
أول مرة قابلته فيها..
قلوبنا دايماً بتقولنا الحقيقة من أول مرة بس إحنا اللي بنصر
مانسمعهاش ..
بتدلنا على حقيقة اللي حوالينا بدون أقتعة بس إحنا اللي بنفضّل
الأقتعة اللي بتحسسنا بسعادة مؤقتة زائفة..
ولما بنفوق ممكن نكون خسرنا أصدق ناس ممكن نقابلهم في حياتنا..
ممكن نكون خسرنا حب حقيقى ممكن مانقابلوش تانى..
إسمعوا دايماً لصوت قلوبكم لأنها دايماً صادقة، حتى لو كان الصوت
ده هيوجعك بس عمره ما هيخدعك..

إتمسكوا بالناس اللى بتؤمن بيكم بجد..
الناس اللى بتحبكم بعيوبكم قبل مميزاتكم..
الناس اللى تستحملكم وتقدركم..
لأن هما دول اللى هيفضلوا جنبكوا للنهاية مش هيسيبوكم ولا يتخلوا
عنكم فى وسط الطريق..
ولإن العمر أقصر من إننا نضيعه مع ناس مزيفة تستنزفنا وتموت كل
حاجة جميلة جوانا..

الحياة ممكن تمنحنا أشخاص كثير .. أشخاص بياخدوا أماكن مختلفة في

حياتنا

منهم القريب ومنهم الصديق ومنهم الحبيب وغيرهم كثير ...

بس دائماً فيه حد فيهم يبقى ليه مكانة مختلفة عن غيره ..

حد بتحس من جواك إن الحياة بتقف على وجوده فيها ..

حد يومك مبيعديش من غيره ويبقى زي التلات الحزين لو مسمعتش

صوته..

بتحس إنك زي المجنون لو مكلمتوش..

كل شويه تبص لمويلك وتستننى منه مكاملة .. رسالة .. أو حتى رنة..

تبص علي صفحتك مستننى تبدأ شات معاه....

بتعدي الدقايق ساعات وإنك متسمر أدام الشاشة مستننى منه كلمة..

إحتياجك يبقى حتى ولو لمجرد كلمة منه ..

كلمه زي وحشتنى.. ازيك.. عامل ايه.. عايز اشوفك حالاً.. وجودك فارق

معايا.. محتاجك جمبي.. كلمه منك طبطبة..

حياتي ملهاش طعم من غيرك.. إنت الشئ الوحيد اللي بتمناه يفضل

جمبى... وغيره وغيره..

لو مسمعتش قاموس الكلمات دى رغم بساطتها هيبقى يومك ناقص

ومعكنن ومقريف ع كل اللي حواليك..

وجود الشخص دا في حياتنا مش مجرد إختيار بإرادتك ومزاجك ..

ولا هو زرار بنضغط عليه ونقول هحتاج لفلان أو علان أو هنجب دا..

الاحتياج للحب مش مجرد إحساس بتحس بيه مرة واحدة

ولا له مقدمات ولا بتضغط علي نفسك لشعور معين تجاه حد..

لانه زي الانفلونزا مبتحسش بيها إلا وأنت بتعطس..

وإبقوا قابلى لو خرجت منه ولو ب طن أوجمانتين...

أصعب العلاقات اللى فى الدنيا وأكثرها وجعًا
هى العلاقات اللى مالهاش مُسمى واضح وصریح ..
العلاقات اللى بتقوم على عاتق طرف واحد بس ..
طرف بيدى علطول وطرف تانى بياخد وبس من غير ما يفكر أنه
يدى ولو حتى قليل ..
تحس إن الطرف التانى بيقولك شوف المكان اللى هيرحك تكون فيه
فى حياتى وحت نفسك فيه ..
بس لا تستنى منى حاجة ولا أنا هعمل حاجة ،
مش ملزم أبادلك نفس المشاعر بس أنا عارف مشاعرك وواثق منها
كويس ..
مش ملزم أكون جنبك لما تحتاجنى بس متأكد إن إيدك أول إيد
هتتمدلى لو وقعت ..
مش ملزم أهتم بيبك وبتفاصيلك بس عارف إن محدش هياخد باله
من اللى يخصنى ويهتم بيا زيك ..
مش ملزم بأى حاجة ولا أنت كمان ملزم بحاجة بس أنا عارف
ومتأكد إنك هتعمل علشانى كل وأى حاجة ..
ببساطة علاقة جزء من أساسها كلام كتير فعل مافيش ،
ساندها طرف والتانى بيتفرج عليه و كل فىن وفىن كده بيقوله :
« براقو »

العلاقات ديه بتستزف طرف واحد فيها بيفضل يدى من غير مقابل ..
لغاية ما بيبجى فى وقت ويحس فيه بأنانية الطرف التانى .. بيحس
فيه أنه لازم يتوقف قبل ما يخسر نفسه ..
ووقتها بيععد وبيقسى من غير ما يفرق معاه شئ ..
ووقتها بيفتقده الطرف التانى وبيحس بمقدار الخسارة اللى خسرها
ومهما حاول أنه يرجعه أو يستميله عمره ما يرجع ..

حاولوا تحافظوا على الناس اللى زى ديه فى حياتكم وإعرفوا قيمتهم
.. وإوعوا تتعاملوا بأناية مع المشاعر،
عشان ما تخسروش ناس صادقة أثبتوا حبهم ليكوا بالأفعال قبل
الأقوال ..

أكثر الأشياء المحزنة في الدنيا إنك تقابل شخص تشوف فيه كل اللي
بتتمناه..

قلبك يميل ليه ويبقى بيعنى بالنسبة لك كثير ..

شخص بيبقى مختلف عن اللي حواليه ..

مش لحاجة لكن بسبب إحساسك ناحيته ..

عشان كده بتشوفه مختلف في كل حاجة ..

شخص بيخلى للدنيا في نظرك طعم ومعنى مختلف ..

شخص بتشوف فيه العوض عن كل الأيام والآلام الصعبة اللي عشتها
في حياتك ..

شخص بتعيش بين إيديه أسعد لحظات حياتك وتحس معاه بالراحة
والطمأنينة ..

شخص بتفتح له قلبك من غير ما تحسبها أو حتى تقلق من حاجة ..

لأنك بتتعامل معاه كأنك بتتعامل مع نفسك ..

بتسمع نبضات قلبك وأنت معاه ،

وتحس أن روحك بتفرح من السعادة اللي بتعيشها وأنت بين إيديه ..

لكن للأسف مقدر لك إنك تكتشف في النهاية إن اللي بينكم مستحيل

..

إنه مش مقدر ليكم إنكم تكونوا مع بعض ..

وإن عليك الإنسحاب والتسليم إنه مش ليك ..

عارفين إيه هو الحب الصادق ..

الحب الصادق هو الحب اللى بيظهر في وقت الإنهيار..

الحب الصادق هو شخص بيلاحظ أبسط التغيرات في ملامح وجهك أو نبرة صوتك..

هو شخص بيشعر ما بك من حزن من غير ما تحتاج إنك تتكلم..

شخص يؤمن بالشئ الحلو اللى جواك مهما ساءت تصرفاتك ...

شخص عارف عيوبك بس بيتقبلك زى ما أنت ..

شخص معاه بتبقى على طبيعتك ومش بتضطر تتصنع وإنه معاه
عشان تعجبه ..

شخص بتحس بالأمان وأنت معاه حتى لو العالم كله ضدك ويبحاربك

..

بتحس إنه صمام الأمان في حياتك وإنك معاه مستعد تواجه أى شئ ..
شخص عارف حقيقة شعورك رغم محاولتك المستميتة في إظهار
عكسه..

شخص رغم كل جواه من خراب إلا إنه بيحاول إصلاحك ..

الحب الصادق هو الأيديين اللى بتمسك بإيدك عشان تساعدك

وترجعك وتوقفك على رجلك لما تيجى عليك الدنيا وتهدمك الحياة

الأحبة اللى بجد هما اللى يرمموا ما يتلف من روحك وابتسامتك
وقلبك ..

هما اللى بينحازوا لصفك ومش بيتنازلوا عنك أبدًا ..

تفتكر كام مرة في حياتك ممكن تقابل حب صادق ...؟

عارفين إيه أكبر جريمة ممكن يعملها البنى آدم في حق نفسه..؟

العشم

كسرة النفس اللي بتشوفها في عين أى حد كان تعبان أو مخنوق أو حد عنده حالة وفاة وتعرض لخدلان رهيب من أشخاص إتخلوا عنه في الموقف ده ،

صحيح إن الدنيا مبتقفش والحياة هتستمر ، إنما كسرة النفس و الحزن الى بيبان في عيون الشخص ده بيكون سببها إنه أتعشم في الشخص ده بالذات حتى لو فيه حواليه غيره أو أحسن منه متبقاش فارقة معاه أد الشخص ده ، لان عشمك في الناس هو اللي بيهدك بجد .

فرحتك بالفستان على المانيكان و جنانك بيه ... لما تقيسيه و تلاقيه مش على مقاسك، قفلتك من أى لبس بعد كده بيكون سببها عشمك في الفستان ده بالذات ، مش إن باقى اللبس وحش ..

انتظارك بالساعات لأكلة في الفرن و في الاخر تلاقيها ناقصة ملح دا ممكن يخليك ماتكلش اليوم كله مع ان امبارح كلت اكل بايت و كنت مستمتع جدا بس انتا كنت متعشم في الاكله دى

و مطلعتش زى ما تعشمت فيها فخلاص قفلت من الاكل.

الموقف اللي بيحصل من حد من صحابك و بيزعلك منه جدًا، رغم ان حصل اكبر منه من غيره و مزعلتش ده سببه العشم ،

زعلك مكانش من الموقف نفسه ، زعلك ان الموقف حصل من الشخص ده بالذات و انتا عشمك فيه غير كده.

عرفتوا بقي إن العشم دا هو اللي بيقتل اي احساس حلو جاي من حاجه تانية

حتى لو كانت احلى..

حاول تقلل من عشمك على أد ما تقدر .. متحطش ثقتك في حد أوى شان الخدلان منه ما يكونش جارح أوى ...

العشم هو اللي بيقتل اى حاجة تانيه هتيجي حتي لو احلي،
ف على قد ما تقدر قل من عشمك .

هتلف في حياتك كثير وهتقابل ناس كثير جدا ..
منهم اللى يستحق إنك تدخله فيها وفيه اللى ميستحقش أساسًا أنك
تضيع وقت في الكلام معاه..
لكن عمرك ما هتلاقى حد أحسن من اللى شالك وقت ضعفك ووقت
حزنك ومشاكلك ..
ورغم كل دا وقف معاك ومسابكش..
ما فكرش يتخلى عنك بالرغم من أنه ممكن يكون هو نفسه محتاج
لى يقف جنبه ويمد له إيديه ..
وما سابكش تواجه الدنيا وصعوباتها لوحك ...
كل اللى فكر فيه هو أنه يفضل ماسك في إيدك لحد ما تعدى أزمته

..

الناس ديه هي اللى بتقف جنبك وقت مشاكلك...
هي اللى مهما اتعصبت عليها وقت زعلك عمرها ما بتزعل منك...
هي اللى بيقولك طلع اللى جواك فيا وأنا هستحملك
هي الناس الجدعة هي اللى لما تحتاج حاجة تلاقها في ضهرك حتى
لو متخانقين مع بعض ...
هي اللى بتفهمك وتقدرك حتى لو جيت عليها في يوم...
هي اللى بتلمس نبرة الوجد في صوتك وصمتك وما بتحاولش تناقشك

..

بس بتدور على حاجات تفرحك وتسعدك وتنسيك آلامك وهمومك
الناس اللى زى ديه عمرها ما هتتعوض ..
مهما مر في حياتك من وجوه وأشكال كثير ..
لو في حياتكم الشخص دا أمسكوه ومتفطوش فيه أبدًا..
حسسوه إنكم بتقولوا له شكرًا لإنك في حياتي..

بمناسبة فتاوى الضرب وبوسات السادية اللى طفحت على الفيس
في مشهد في فيلم فرنسى البطلة كان اسمها « كيت » إختلفت مع زوجها
« إيثان » فبكت ...
إيثان مسبهاش ، مقلهاش أضربى دماغك في الحيط وستات نكدية ودور
الضرب والإهانة ...
لأفضل يراضى فيها لوقت متأخر من الليل وهى رافضة لحد ماراحوا
في النوم وهو بيراضيها..
ما علينا...
الفكرة مش في أنك متزعلش شريكك ، الفكرة أنك لما تزعله متسبهوش
من غير لما تراضيه ،
متسبهوش فريسة للحزن وتخلى الدموع توجعه..
لو مقدرتش تراضيه وتخفف زعله شاركه الزعل ...
أزعل على زعله...
متفكرش بقى في فتاوى فلان ولا علان ولا مين قال إيه ولا سرد إيه..
دول عالم تعبانة حرفيا في مخها.. وبعيدة كل البعد عن أصل الدين...
رسولنا الكريم نفسه بالرغم من المكانة العظيمة والمنزلة الرفيعة التي
كان يتمتع بيها..
إلا إن الرقة اللى كان بيتعامل بيها مع زوجاته كانت بتفوق الوصف..
ولينا في رسولنا القدوة والأسوة الحسنة، وهونعم القدوة ونعم الأسوة ..
إحنا كبشر طيبين بنتراضى من أقل كلمة
بس بتفرق معنا قوبوخصوصًا الستات بيفرق معاها أوى إنك تكون
بتخاف على زعلها..
الكلمة بتفرق .. والموقف بيفرق .. والإهتمام بيفرق .. والإبتسامه بتفرق
.. والسؤال بيفرق ..
عمر العنف والتجاهل ما كان سبب لحل مشكلة ..

بالعكس هما سبب كل المشاكل والخلافات والتصدعات اللى بتواجهها

العلاقات دائماً ..

عشان كده حافظوا على علاقاتكم وإتعاملوا باللين والحسنى

وإستحملوا اللى بتحبوهم عشان هما كمان يستحملوكوا

الطباط طيب «جون دبليو مانسور» كتب في كتاب (Hte Mhssileer)
إن في منتصف السبعينات وفي خلال حرب فيتنام كان فيه قذائف هاون
متتالية وقعت على مدرسة أطفال فى قرية صغيرة هناك وجابت كل
المدرسة على الأرض ..
أغلب الأطفال ماتوا ومفضلش غير كام طفل أعمارهم مش أكثر من
٨ سنين ..

وقتها تم إستدعاء فريق طبى من الصليب الأحمر على رأسه الطبيب
(جون) عشان يحاولوا ينقذوا ما يمكن إنقاذه من أرواح الأطفال ..
ووصل الفريق الطبى لمكان الحادثة .. لقوا من ضمن التلاميذ المصابين
بنت إسمها « كاتى » كانت روحها بين الحياة والموت ..
« كاتى » كانت محتاجة نقل دم بسرعة .. وبكشف سريع أكتشفوا إن ولا
واحد من الفريق الطبى فصيلة دمه تتناسب مع البنت .. وبالشكل
ده البنت هتموت ..

الدكتور « جون » بص للعيال بتوع المدرسة اللى لسه عايشين، ولإنه
ما يفهمش فيتنامى أضطر يتكلم بالإشارة معاهم وقال لهم إن « كاتى »
هتموت لو محدش أتبرع لها بالدم ..

العيال الصغيرين فضلوا مترددين، لكن فجأة ولد رفيع ووشه ممصوص
رفع إيده وقال : (أنا) ..

عرفوا إن إسمه « هنج » ..

بسرعة قعدوه على كرسى وربطوا دراعه بأنبوبة عشان يلاقوا العرق
بتاعه ويبدأوا نقل الدم ..

« هنج » أول مادخلوا الإبرة فى دراعه صرخ صرخة مرعبة .. الدكتور
بصله وسأله :

(هل تؤمك؟) ..

الولد هز رأسه بالنفى وهو بيعض على شفايفه وبيشاور للدكتور إنه

يكمل ..

الدكتور كمل سحب الدم وبعدها بلحظة « هنج » صرخ تانى وحوط

إيده على وشه برعب ..

الدكتور بصله تانى ووقف السحب وسأله تانى : (هل تؤملك؟) ..

الولد رد : (لا)

الدكتور كمل سحب الدم وهو مش فاهم الولد ماله ..

« هنج » كل كام ثانية كان بيصرخ ويبيض على شفائفه ولما يسألوه

يشاور لهم يكملوا ولا إين فيه حاجة ..

فى اللحظة دى وصلت للمكان ممرضة فيتنامية ولما شافت توتر

« هنج » أنكلمت معاه بالفيتنامى بسرعة عشان تفهم فيه إيه ..

فهمت كان بيصرخ وببيكى ليه ..

فبصت للدكتور وقالتله : (كان يظن أنه سيموت ، فقد كان يعتقد أنه

سيترع بدمه كله لكى تعيش « كاتى ») ..

الدكتور سأل الممرضة : (لكن ما الذى جعله يُقدم على هذا العمل

من الأساس إن كان متأكد إنه سيموت؟) ..

الممرضة سألت السؤال لـ « هنج » فرد عليها ببساطة :

(إنها صديقتى) ..

الأديب « توفيق الحكيم » قال :

(الصداقة... إنها الوجه الآخر غير البراق للحب؛ ولكنه الوجه الذي

لايصدأ ابداً) .

فى وقت معين لو عندك صديق بجد هتكون متأكد إنه مش

هيستخسر فيك أى حاجة حتى لو روحه ..

الفيلسوف « سنيكا الأصغر » قال : (دائماً ما تفيد الصداقة، أما الحب

فيضر أحياناً) .

حب الصُحاب هو السند اللى دايمًا فى الضهر ووجودهم أمان ..

الى الحاجة الى فى ايدهم فى ايدك قبلهم ..
الى بتدوب بينكم حواجز الزمن والمكان .. والى الواحد منهم بألف ..
شركاء الهلس والتهييس والمواقف الصعبة وبراميل الجدعنة وولاد الأصول

..

الى قبل ما تعوزهم بتلاقيهم ..
د « أحمد خالد توفيق » قال :
(معنى الصداقة هو أننى تلقائياً أراك جديراً بأن أئتمنك على جزء
من كرامتى)

أثناء وجود الإستعمار البريطانى فى الهند، حدث أن ضابطًا بريطانيًا صفح مواطنًا هنديًا على وجهه، فكانت ردة فعل المواطن الهنذى أن صفح الضابط بكل ما يملك من قوة وأسقطه أرضًا .

ومن هول الصدمة المذلة انسحب الضابط من المكان وهو يستغرب كيف تجرأ مواطن هندى على صفح ضابط فى جيش إمبراطورية لا تغيب عنها الشمس، واتجه إلى مركز قيادته ليحدثهم بما حصل، ويطلب المساعدة لمعاقبة هذا المواطن الذى ارتكب جرماً لا يغتفر . لكن القائد الكبير هدأ من روعه، وأخذة إلى مكتبه، وفتح خزينة ممتلئة بالنقود وقال للضابط : خذ من الخزينة خمسون ألف روبية، واذهب إلى المواطن الهنذى واعتذر منه على ما بدر منك، وأعطه هذه النقود مقابل صفحك له.

جن جنون الضابط وقال مستنكرًا: أنا من له الحق فى صفعه وإذلاله، لقد صفعنى وهو لا يملك الحق، هذه أهانة لى ولك، ولجيش صاحبة الجلالة، بل إهانة لصاحبة الجلالة نفسها.

قال الضابط الكبير للضابط الصغير :

اعتبر هذا أمرًا عسكريًا عليك تنفيذه دون نقاش ..

امتلل الضابط لأوامر قائده، وأخذ المبلغ وذهب إلى المواطن الهنذى، وعندما عثر عليه قال له:

- ارجو أن تقبل اعتذارى، لقد صفعتك ورددت لى الصفعة، وأصبحنا متساويين، وهذه خمسون ألف روبية هدية مع اعتذارى لك. قبل المواطن الهنذى الاعتذار والهدية ونسى أنه صُفح على تراب وطنه من مستعمر يحتل أرضه.

كانت الخمسون ألف روبية فى تلك الفترة تعتبر ثروة طائلة، اشترى المواطن الهنذى بجزء من المبلغ منزلًا، وجزء احتفظ به، وجزء اشترى به «ركشة»، (الركشة وسيلة نقل أجرة بثلاث عجل يستخدمها الهنود

في تنقلاتهم)، واستثمر جزء في التجارة، وفي وسائل النقل، وتحسنت ظروفه، وأصبح مع مرور الوقت من رجال الأعمال، ونسى الصفة، لكن الإنجليز لم ينسوا صفة الهندي للضابط. وبعد فترة من الزمن استدعى القائد الانجليزى الضابط الذى صُفح وقال له:

- أتذكر المواطن الهندي الذى صفحك؟؟.

قال الضابط: كيف أنسى!!؟.

قال القائد : حان الوقت لتذهب وتبحث عنه وبدون مقدمات اصفحه أمام أكبر حشد من الناس.

قال الضابط : لقد رد الصفة وهو لا يملك شيئاً، أما اليوم وقد أصبح من رجال الأعمال وله أنصار وحراس، فهو لن يصفعنى فقط ، بل سيقتلنى.

قال القائد : لن يقتلك، اذهب ونفذ الأمر بدون نقاش.

امتلل الضابط لأوامر قائده وذهب إلى حيث الهندي، كان حوله أنصاره وخدمه وحراسه وجمع من الناس، فرفع يده وبكل ما يملك من قوة صفح المواطن الهندي على وجهه حتى أسقطه أرضاً.

لم تبدر من الهندي أى ردة فعل، حتى أنه لم يجرؤ على رفع نظره في وجه الضابط الانجليزى.

اندهش الضابط وعاد مسرعاً إلى قائده .

قال القائد للضابط : إني أرى على وجهك علامات الدهشة والاستغراب؟؟.

قال: نعم في المرة الأولى رد الصفة بأقوى منها، وهو فقير، ووحيد، واليوم وهو يملك من القوة ما لا يملك غيره لم يجرؤ على قول كلمة، فكيف هذا؟

قال القائد الانجليزى : فى المرة الأولى كان لا يملك إلا كرامته ويراهها أعلى
ما يملك فدافع عنها.
أما فى المرة الثانية وبعد أن باع كرامته بخمسين ألف روبية فهو لن
يدافع عنها فليده ما هو أهم منها.

نصيحة لوجه الله..

إهربوا من إلى طول الوقت بيشتكوا ، حتى وهما في أحلى أيامهم
بيشتكوا ،

على الفيسبوك بيشتكوا ، في الساحل بيشتكوا ، بيتخطبوا بيشتكوا ،
بيتجوزوا بيشتكوا ..

بيصحوا يشتكوا ، ويناموا يشتكوا ، بياكلوا بيشتكوا ، بيضحكوا بيشتكوا..
إهربوا من إلى عينهم مش بتشوف غير الوحش ،

ومش بيميزوا غير الوحش ، وبيعرفوا يحولوا الحلو لوحش .

إهربوا من إلى قعدتهم تجيب إكتئاب وقلق وإحباط وتوتر وطاقة
سلبية وحزن طول القعدة..

إهربوا من إلى بيدوروا على عيوبكم وبيتصيدوا أخطائكم

ولو حتى كنت سبب رئيسي في نجاحهم ،

وعايزنكوا دائماً مقصرين .

إهربوا من إلى بينقظوا طاقة سلبية على إلى حوالهم ، وبيوظوا
حياة أي حد بيدخلوا فيها ..

إهربوا من ناس مش شايفين الجمال في حياتهم ولا حياة غيرهم ..

الناس إلى مش بتشوف غير الجزء المعتم في كل حكاية ..

إهربوا من الناس إلى بتحبطكم وتثبطكم و بتقتل أحلامكم جواكم

و بكلمة أو نظرة سخرية منها ومنكم ..

متحاولوش تحكوا لهم وتشاركوهم مشاعرهم ولا حياتكم ولا حتى
أحلامكم ..

ما تخلهمش يقتلوا الحاجات الجميلة إلى جواكم بسلبيتهم
وسوداويتهم ...

إهربوا بجد ، وابعدوا عنهم ، وجرجروهم برا دايرة حياتهم ، خلوا
علاقتكم بيهم محدودة جداً وفي إطار الواجب..

دوروا على غيرهم ،
دوروا على ناس إيجابية دخلوها حياتكم..
ناس تكون بتحب الصبر والأمل والتفاؤل والسعادة
والقطط ها اهم حاجه القطط والحيوانات والزرع والموسيقى..
ناس بتشوف كل حاجة حلوة ..
عشان يخلوا حياتكم أحلى ..

فاكرين فيلم أفواه وأرانب.. إخراج بركات وقصه سمير عبد العظيم..
أول عرض للفيلم دا كان سنة ١٩٧٧ ونجح في عمل ضجة، ولحد دلوقتى
من الأفلام المفضلة عند ناس كتير..

وطبعًا كلنا عجبنا نهايته الحلوة ومحمود ياسين واخد نعمة وولاد
أختها ورايحين عشان يبدأوا حياة جديدة سعيدة فى المزرعة السعيدة
وصوت العصافير بيزقزق حواليهم وهما راكبين العربية ويحلّموا
ببكرة..

لغاية هنا والدنيا حلوة والنهاية السعيدة المعتادة زرعت الأمل فى
قلوب الناس ..

لكن متفتكروش إن القصة إنتهت على كدا..

لا تعالوا بقى أفاجتكم إن فيه جزء تانى للفيلم اسمه (كفر نعمة)..

بس للأسف متصورش فاتحول لعمل إذاعى بنفس الأبطال..

تفتكروا بقى إيه اللى حصل فيه.....؟

اللى حصل فى الفيلم إن شوية شوية محمود بيه حس إنه إتجوز
واحدة أقل منه فى كل حاجة.. وزهق من حشر مناخيرها فى الكبيرة
والصغيرة

ولاد أخت نعمة طلع واحد منهم من السجن وكل شوية يسرق حاجة
من المزرعة ويبتزهم..

طلع لهم جار مؤذى اللى هو جميل راتب ،

سمم كل عنبر الفراه وموت كل حيواناتهم...

راجية أخته فضلت تتعاون مع كريم صاحبه ومساعدته لحد ما بدأ
يخونه ويطلع أسرار شغله...

نعمة الفلحوسة خلته يشتري أرض فى الصحراء ثلاثين فدان دفع دم
قلبه فيهم ...

على أساس هتخضرها بشطارتها أثارها طلعت صحرا خالص ومفيش

ميا وفلسته..

إتعرف على واحدة تانية وخطبها..

وكل يوم المزرعه تنسرق... والممكن وكل حاجة..

لحد ما عرف إنها بتداري عليه فضايح ولاد أختها..

إتخانق مع نعمة .. وبدأ يشوفها على إنها بوز فقر وجاهلة ومش

من مستواه وطردها وبعثها ورقة الطلاق على القسم ..

لكن كعادة الأفلام العربى الأمور بتتحسن فى الآخر إلى حد ما..

المهم .

متصدقوش الافلام العربى فى كل حاجة ..

ومتتوقعوش نهاية المواقف العاديه على إنها بتخلص دايماً بالخير زى

ما الكاتب عايز..

الواقع والمجتمع بيحكم على الناس أفضح أحكام ومحدث بيغفر ولا

بيسامح..

بس تفائلوا برده فى كل الأحوال....

أحياناً بندخل في حياتنا ناس بنحطهم في ركن خاص فيها ..
الناس ديه هى اللى سمحنا ليهم بالعافية بدخول حياتنا.. وفتحنا لهم
الباب عشان يكونوا جزء منها ..
الناس اللى استهلكونا وخلصوا عمرنا معاهم..
الناس اللى خدت منا ومن وقتنا ومن مشاعرنا وتفكيرنا ووقتنا وجهدنا
معاهم ..
الناس اللى إستنزفونا وإستنزفوا طاقتنا معاهم ..
لدرجة أنه مبقاش فيه وقت نعوض حياتنا اللى تاهت وراهم..
ولا عمرنا اللى ضيعناه بإيدينا في أوهام بنينا منها قصور ..
إستهلكونا في مشاكل.. وتبريرات.. وإعتذارات..
خلصوا كل مخزون الصبر والإحتمال..والطاقة.. والتعايش..
سرقوا منا كل مشاعرنا الحلوة وأحاسيسنا من غير ما يقدرنا قيمتها..
سرقوا منا أحلى ذكريات رسمنا بيها عمرنا معاهم في كل ركن وزاوية
ومكان..
الناس ديه هيفضلوا طول عمرهم مديونين لينا بوقتنا وعمرنا وطاقتنا
وصبرنا ،
والأهم مشاعرنا اللى مقدرنا قيمتها...
لازم يفهموا إنهم عذبونا عذاب مش قليل..
خلونا نفقد الثقة في أى حد بيحاول يقرب منا.. مش عشان الحب
اللى كان جوانا ليهم ..
لا دا عشان هما استهلكتنا..
للأسف دلوقتى حتى لو قابلنا حد كويس و مقدر قيمتنا .. مبقاش
عندنا مخزون مشاعر و صبر و إهتمام و حب نديهوله ..
عشان إستهلكنا طاقتنا و مشاعرنا مع ناس زيهم معدومين الضمير..
وزى ما اتقال زمان

لا سلامًا على من استهلكونا .. فأهلكونا..
فأفقدونا أنفسنا...

أحياناً بنفضل نفكر كثير قبل أى تصرف ..
يا ترى الناس هتشوفه إزاي .. يا ترى هيفهموه ولا لأ .. طب الناس
هتقول إيه ..؟
زى ما تكون الناس هى الحكم ، وزى ما يكونوا هما اللى بيسيروا
حياتك ..
ليه تحط فى حسابك اللى بيفكر فيه الآخرين عنك..؟
الناس كده كده عمرها ما هترضى عنك ولا هيجتمعوا على إنك صح
أو غلط ، كويس ولا وحش ..
أنت الوحيد اللى هتخسر لما تفكر فى نظرة الناس وتفكيرهم ..
إعمل اللى إنت عايزه واللى شايفه أنت صح طالما مش بتعمل حاجة
غلط ..
إعمل اللى يناسبك ويناسب إحساسك وشخصيتك ومالكش دعوة
بالناس ولا تفكيرهم ..
عيش حياتك .. إجري .. إنطلق .. أرقص .. غنى .. إضحك .. إبكي ..
مالكش دعوة بحد ..
عيش زى ما إنت حابب تعيش مش زى ما الناس حابك تعيش ..
عيش تلقائيتك .. عفويتك .. عيش بقلبك قبل عقلك ..
ما توقفش حياتك على كلامهم الأجوف
لأنه هيجى عليك اليوم اللى هتحس أنك أهدرت أئمن لحظات عمرك..
فى تحسين صورتك أدام عيون مش بتشوف إلا اللى هى عايضة تشوفه
وبس ..
هيتكلموا من وراك .. خليههم يتكلموا ..
عيش عفويتك وبساطتك وسيههم يظنوا زى ما يظنوا ..
إوعى تندم أبداً فى أى وقت على دخول أى شخص بحياتك حتى وإن
كان تافه..

فالناس الجيدة هيعطوك السعادة..
ومنهم اللى هيسيبك الذكريات اللى مش هتخرج من عقلك بسهولة..
والتافهين هيعطوك التجربة والدروس فى كل الحالات ..
عشان كده .. عيش عفويتك وأترك لهم إنهم الظنون..

لا يوجد أفضل من الشخص الذي يجمع بين الأمرين..
الذي تستطيع أن تمزح معه دائماً دون قيود أو تكلف ..
وتتحدث معه أيضاً بجدية عن أعمق ما بداخلك بدون قلق.. ولا
خوف ..

هذا الشخص قد تجمعك به علاقة ما .. كالحب أو الصدقة أو القرابة
أو غير ذلك ..

أو تجمعك به صدفه عابرة أو لقاء أثناء رحلة ما أو في مناسبة ..
ستجد نفسك وهى تهفو دوماً إلى لقاءه والبقاء معه لأطول وقت..
ستجده وقد أصبح جزء لا يتجزء من حياتك ..
وكأنه ذلك الجزء الآمن وسط صحراء قاحلة يسودها الجفاف ..
سيكون الوحيد الذى يجعلك تتحمل قسوة الحياة ومرارتها ..
ولأن الأرواح جنود مجندة ما تعارف منها ائتلف وما تناكر منها
اختلف ..

فستجد روحك ترتاح وتنجذب إليه ..
ستجد نفسك وقد إعتادت على وجوده ولن تستطيع التخلي عنه ولو
حاولت ..

ستجد قلبك يميل إليه رغماً عنك ..
وكأن أرواحكم قد إرتبطت من قبل في مكان ما أو في وقت ما..
قد لا تكون بينكما العلاقة حباً أو إرتباطاً ..
لكنه قيد حديدى مبهم سيربطك به إلى آخر العمر..
قيد ستسعى للمحافظة عليه ليربطك به دوماً
قيد يربط أرواحكم وقلوبكم لتبقى تلك الصلة التى تظل أقوى من
أى صلة أو رابط قد يربطك بأحدهم يوماً
صلة الأرواح...

لا تندهش حين تشعر يوماً أنك قد أصبحت لا تفرح...!!!
وكأنك نسيت كيف يكون الإنسان سعيد ..
وكأنك قد إعتدت على تذوق الألم ومعاشته ..
الأمر يشبه إعتياد أنفك على إستنشاق رائحة معينة ..
فهذا يجعلك لا تشعر بها مع الوقت ..
فشعيرتك الخاصة بحاسة الشم قد ماتت
أو إعتياد أذنيك على سماع صوت معين ..
مما يجعلها تشعر وكأن الهدوء هو الإستثناء ..
فالأعصاب الحساسة المسئولة عن السمع قد ماتت..
كذلك الأمر حين نعتاد على الألم ...
فنحن لا نعتاد عليه إلا لو مات بداخلنا شئ ..
و حين تموت الأشياء أمامنا يصبح كل ما يمر بنا عادى..
تفقد كل الأشياء في نظرنا قيمتها وبريقها ..
لن يعود يبهرنا شئ ،
لن تحرك مشاعرنا الأحداث ..
تتساوى الألوان ..
يتساوى الأشخاص ..
حتى الشروق لن يختلف عن الغروب كثيراً
نفقد إحساسنا بالجمال ..
وتتساوى في عيوننا كل الوجوه ..
هل علمت الان لماذا أصبحت لا تفرح...؟

في المشهد الشهير من فيلم السلم والثعبان لما حازم يقول لياسمين:
«ياسمين ... أنا مش عايز أكمل , أنا أتخنقت .. مش هقدر أبقي بطل
الفيلم بتاعك .. مش عايز أتعبك معايا أكثر من كده .. صدقيني أنا
حاولت بس حاسس إن أنا بزق في حيطه .. كده أحسن»
ياسمين ساعتها ردت بكلمات محمد حفظى قائلة «طبعا كفاية عليك
كده .. لحسن تفوتك حاجة أحسن مش كده ..!؟!

على فكرة إنت مابتفكرش غير في نفسك .. إنت عمرك حبتنى...!!؟!!،
إنت عمرك حبيت أى حد !!؟! .. ، اللى مجننى إن الناس كلها كانت
عارفة حقيقتك إلا أنا ماصدقتهمش ودافعت عنك ، على فكرة إنت
صعبان عليا أوى، إنت قعدت تجرى ورايا شهور علشان توصل لحاجة
واحدة بس ، مع إن كان عندك كل حاجة ..

بس علشان تبقى فاهم بقى ، أنا هخرج من هنا وهقدر ألقى حد
أحبه وأديله كل حبي وهيقدرنى .. بس إنت قدامك سكة من الأثنين...
لهتموت لوحدك .. لهتعيش مع واحدة مش طابق تبص في خلقتها ..
بس اللى أنا متأكدة منه بقى إنك عمرك عمرك ما هتعرف الإحساس
اللى أنا عيشته» ...

صحيح الفيلم إنتهى بإن حازم يندم ويحس إنه فعلا بيحب ياسمين
ويرجعلها ويتجوزوا ..

بس للأسف ...

الحقيقة إن فيه ناس كتير زى حازم كده ، بيجروا ورا الحاجة لحد لما
تبقى في أيدهم ...

ولما ده يحصل بيبيع ويتخلى عنها ، ويبخسرها للأبد ، لأنه ببساطة
مايستاهلهاش ومايستاهلش حبتها ..

اللى زى حازم مش يرجع ومش لازم يرجع

ولإن القلوب مش لعبة ولا هي رهان بتكسبه .. ولا عمرها بتمشى
مبدأ «اتقلي عليه هيجرى وراكي»
لو هو محسش بقيمتها واهتمامها في وقتها يبقى مايستاهلش
حازم مايستاهلش ياسمين ولا حبها
الى زى حازم هيعيش يتنقل بين قلوب كتير لكن عمره ما هيلاقى
مشاعر حقيقة ..
كل الى هيلاقيه هي مشاعر مؤقتة ومزيفة ..
وهيعيش طول عمره ندمان على الصدق الى ضاع منه وتاه وسط
زحمة أنانيته وغباؤه..

إلى كل أنثى....

عيشى حياتك وإنطلقى وإوعى تفضلى ماشية وإنتى شايلة عاى ظهرك

هموم الحياة

إوعى تكبرى قبل أوانك بحجة المسؤولية أو الظروف أو صعوبات

الحياة ..

إعملى كل حاجة إنتى نفسك فيها أو بتتمنيها ما دمتى مش بتعملى

حاجة غلط

وما دمتى محافظة على مبادئك ودينك وأخلاقك..

مالكيش دعوة بالناس لإن الناس دايماً بتتكلم وبتنتقد الأنثى ..

دايماً الأنثى متهمة وبتشير ليها أصابع الإتهام حتى لو عملت الصح..

وخصوصاً فى مجتمعاتنا الشرقية ..

بالرغم من إن ديننا أعطاهم حقوق وحرىات كتير ضمن إطاره ..

عيشى حياتك .. ارقصى من الفرح وإنتطى زى الأطفال ... والعبى أى

لعبة تعجبك..

لو عايزة تبكى إبكى .. إصرخى ..

إوعى تحبسى شئ جواكى .. ولا تسجنى نفسك فى سجن من صنع

إيديكى ..

عبرى عن اللى جواكى بحرية من غير قيود ..

جربى اللى إنتى عايزاه .. وإوعى تقارنى نفسك بغيرك ..

مش هتفرق إذا كنتى طويلة أو قصيرة...سمينة أو رشيقة .. بيضاء أو

سمراء ..

إنتى جميلة على كل حال ..

كل إنثى جواها جمال مستخى .. جمال من نوع مختلف عن غيرها ..

جمال الأنثى فى إنها أنثى .. فى إبتسامتها وصدقها وبرائتها ..

فى فطرتها السليمة والطيبة فى إنها تعيش عشان تستمتع بالحياة

وتسعد نفسها والى حواليتها ..
وروحها المرحة ورضاها عن نفسها وعن حياتها ..
والأهم في إنها سر الحياة وشمسها اللى مش بتغيب

البنات مبتعجزش..البنات بتنطفى .. وبريقها بيخفت شوية بشوية...
بتنطفى لما بتشيل مسئوليات مش بتاعتها .. بتنطفى لما بتشيل هموم
أكبر من طاقتها ..

بتنطفى لما قلبها الكبير بينكسر ويتجرح ..
بتنطفى لما تدى الى حواليتها الإهتمام والرعاية وما تلاقش الى
يراعيهما أو يهتم بيها ..

بتنطفى لما تنسى نفسها في زحمة الحياة .. لما بتنسى إزاي تفرح وتبقى
سعيدة ..

البنات زى الورود محتاجة إهتمام ورعاية عشان تفتح ويفوح عبرها ..
ورود بيخليها الإهمال تدبل وتموت وتنزوى ..
البنات بتفرق معاها الكلمة ... كلمة واحدة بسيطة ممكن تفرق كثير

..

كلمة واحدة ممكن ترجعها طفلة في براءة سنواتها الأولى
ضحكاتها تملى المكان وتخلى الحياة تدب في كل الى حواليتها ..
كلمة واحدة بتخليها تنور وتشرق وكأنها شمس في لحظة شروق تنشر
نورها ودفئها في القلوب ..

وكلمة واحدة ممكن تخليها عجوز أخذت منها السنين أجمل ما فيها

..

كلمة واحدة ممكن تخليها تنطفى زى شمعة في مهب الريح ..
البنات هما منبع السعادة في البيوت ..
حافظوا عليهم وراعوهم وإفتكروا دائماً وصية رسولنا لما وجهنا للرفق
بيهم ..

لإنهم قوارير على أد ما بتستحمل على أد ما هى سهلة الكسر ..
وكسورها دائماً بتبقى مستخبية مش بيحس بيها إلا الى بيقترب منها ..
عشان كده حافظوا على الإبتسامة والضحكة والأمل والحياة الى بتملأ

البيت ..

حافظوا على الزهور اللى بتجمع الكل وبتزرع الدفا والحب ...
حسسوهم بالأمان والإهتمام .. وإوعوا فى يوم تكونوا سبب لإنطفائهم ..

الحب اللي بجد في أى علاقة بيتدى أول ما الإعجاب بيخلص ..
أول ما اللمعان الخارجى والإنبهار بالشخصية ديه بيروح ..
وتبتدى تشوف الطرف التانى على حقيقته بدون رتوش وبدون تجميل ..
الحب ده ببيان أوى أول لما توصل للطرف التانى ويبقى كله ملكك ..
أول ما يتوقف عن محاولات تجمله قدامك ..
وتنهار ما بينكم الأسوار و الحواجز اللى بتخبى الصورة الحقيقية لكل
واحد فيكم ..
ويبقى لكل واحد فيكم حرية الدخول والخروج بدون حتى إستئذان ..
الحب اللي بجد يبدأ أول ما الطرف التانى يعريك ضعفه ..
أول ما يكشف قدامك عيوبه ومخاوفه اللى بيداريها ويخبيها عن
الناس ..
بيظهر قدامك بضعفه وفشله وتعبه وصورته الحقيقية اللى بيخبيها
حتى عن أقرب الناس إليه ..
بيظهر قدامك بعقده ومشاكله اللى محتاج يتخلص منها معاك وبيك ..
وبيبقى محتاجك جنبه تتقبله زى ما هو لإنك بتحبه بجد ..
وهو كمان هيحاول يتغير ويتخلص من كل ده عشانك ..
لأنه عاوز يحافظ عليك ..
ياتري هاتفضل تحبه ؟.. هاتفضل عايزه..؟ .. تفتكر هتفضل صورته
زى ما هى في نظرك ؟..
تفتكر هيفضل غالى على قلبك زى ما كان ؟..
يمكن ساعتها بالطبط تقدر تعرف الاجابة عن السؤال البسيط ده..هل
إنت بتحب فعلاً .. ولا اللى جواك ده حاجة تانية..؟
لأنه ببساطة اللى بيحب بيفضل مكمل وشايف جمال في الطرف التانى
هو نفسه مش شايفه ..
وبيختار يكمل حتى لو الواقع متعب والمشوار لسه طويل ..

لكن لو مكنش حب بيختار إنه يهرب وبيتحجج بأى سبب حتى لو
كان تافه ..

الحب الحقيقى بيكمل للآخر مهما كان الطريق صعب ...

نصيحة منى .. متحاولش تتثق في أى حد أذاك قبل كده..
ومتقولش مسامحه والكلام اللي مالوش لازمه دا..
حتي لو انت شايف إنه إتغير ويحاول يقف جنبك ..
صدقني مدام أذاك مرة يبقى هيأذيك ألف مرة ،
وفي كل فرصة هيقدر يأذيك فيها هيأذيك..
محدث بيأذى حد غضب عنه ..
لا دا فكر وخطط ومهتمش إنك هتتأذى وهيكر حاجات كتير جواك
وهيسيب جواك خراب يمكن يفضل العمر كله..
يمكن الغلطة التافهة اللى من وجهة نظره مكنش يقصد يعملها في حقك
قضت على حاجات كتير جواك..
واللى بتهون عليه مرة هتهون عليه كل مرة ..
احفظ كرامتك وحاول متبقاش تقيل على حد تانى وحطها حلقة في ودنك

...

اللى عايز يتمسك بيبك مش هيسيبك ولو كانت عيوب الدنيا فيك..
واللى مش عايزك هيتخلص منك في أقرب موقف ويتلكك لك ولو كنت
ملاك نازل له من السما..
حتى لو سامحت اللى غلط في حقك ، إوعى تنسى أذيته ليك أبداً..
اللي غلط مرة هيغلط تانى وتالت مدام عرف إنك مأمون الجانب
وملكش رد فعل..
سببه ودور على الناس اللى إتمسكت بيبك وحافظت عليك وصانتك..
دور على اللى حبك زى ما أنت بكومة عيوبك واخطائك..
اللي جتله ألف فرصة أنه يسبيك
ومرضيش وإتمسك بيبك أكثر..
صدقني هو جمبك بس شيل إنت الغمامة اللى على عنيك ..
وإخلع النضارة السودا..

«انا حزين اوي يا بومبا وقلبي زعلان»...!
تيمون لما قالها كان حاسس بكم كبير من التعب الداخلى...
يجيب لنا اکتئاب من هنا لحد شهر قدام واحنا بنتفرج على المشهد
٥٥.

إحساس الحزن ده إحساس صعب وخاصة لو لوحدهك ..
إحساسك وکأن فيه جبل رابض فوق قلبك وإنه ضعيف وعاجز إنك
تزيحه ..

حاسس إنك مخنوق ومش قادر حتى تتنفس وکأن الأمل ماسكك من
رقبتك ..

إحساس الحزن بيأثر علينا وعلى سلوكنا وعلى كلامنا وتفكيرنا کمان ...
بخيلينا عاجزين عن التواصل مع العالم والناس ..
بيخليك تحس إن طاقتك نفذت وما بقاش عندك جهد لا للمقاومة ولا
لأى شئ ..

طبيعي إننا نزعل ونتضايق وقلوبنا توجعنا لإننا مش جماد...
وقتها بتحس إنك عايز تتكلم مع حد ولو هيسمع منك بس من غير
ما يتكلم ..

حد يحس بيك ويفهمك ويخفف عنك ولو حتى بنظرة عنيه ..

في الوقت ده بتبقى في أضعف حالاتك ...

عشان كده بتبقى محتاج حد جمبك ..

حد يريحك فعلاً ويشاركك حزنك ويحوله لراحة..

مش تعيش جوا حزنك وتقفل على نفسك الباب

دور على بومبا اللى في حياتك وأشكى له وإفتح قلبك معاه ...

صدقنى هترتاح ... وهيخف التقل اللى جاثم على قلبك ...

فاكرين آخر أغنيه غناها عبد الحليم حافظ قبل ما يموت...؟
كانت أغنية قارئة الفنجان إبداع نزار قباني....
القصيدة دى اتكتبت حرفياً فى سعاد حسنى كتخليد لقصة حب
العندليب والسندريلا...
القصة ابتدت بإن سعاد حسنى كانت صديقة مقربة لنزار قباني
وزوجته بلكيس..
سعاد حسنى كانت بتتعرض لضغوط كبيرة من صفوت الشريف اللى
اشتغلت معاه فترة فى المخبرات ...
ضغوط تحديداً لأنها متتجوزش عبد الحليم.. ليه الله اعلم..
حكى سعاد القصة الكاملة لنزار واللى مقدرش إلا إنه يكتبها فى
قصيدة تخلد قصة الحب المستحيلة اللى بينهم...
واللى عبد الحليم طبعاً مقدرش إلا إنه يغنيها...
بس إتحدف من القصيدة بيت فى مقطع:
فحبيبة قلبك يا ولدى ..نائمة فى قصر مرصود ..والقصر كبير يا ولدى ..
وكلاب تحرسه وجنود ..
إتحدف البيت التانى عشان «كلاب تحرسه وجنود»... خاف عبد الحليم
تقلب عليه صفوت ورجاله...
بعد القصيدة دى إتمنع نزار قباني إنه يدخل مصر لإن الأجهزة الأمنية
كانت عارفه القصيدة عن مين وموجهة لمين.
وفى أول حفلة كان المفروض تتغنى فيها الأغنية فى أعياد الربيع صفوت
الشريف أجر ناس يصفروا ويسقفوا...
وقت ما كان عبد الحليم على المسرح عشان يحاولوا يشوشوا على
الحفلة ... ويحاولوا يمنعوا الأغنية دى إنها تظهر للناس
لدرجة إن فيه واحد من التسجيلات القديمة متسجل لما عبد الحليم
اتضايق فعلاً وقالهم بس بقى...

ومع ذلك كمل الأغنية اللى نجحت نجاح ساحق طبعًا...
ورقة صغيرة لقوها في حاجات حلیم في المستشفى بعد ما مات مكتوب
عليها :

«وبرغم الجو الماطر والإعصار.. الحب سيبقي يا ولدى.. أحلى الأقدار»
وكإنه كان وداع منه لسعاد حسنى من غير ما حد يعرف إنه ليها
..غيرها هى ..ونزار.. وبس.

القصة المذكورة في مذكرات سعاد حسنى .

الشاعر ابراهيم ناجى أول قصة حب في حياته كانت لبنت الحيران
وكان عمره وقتها ١٦ سنة..
وقتها حكمت الظروف إنه يسافر برا يدرس طب ولما رجع كانت
إتجوزت....
لكنه مقدرش ينسى حبه ليها...
وبعد سنين كتير لقى راجل أربعيني داخل يستغيث بيه عشان يلحق
مراته اللي في حالة ولادة متعثرة..
راح بسرعة لبيت الراجل والزوجة كانت بتصرخ وهى مغطية وشها
وفي حالة خطر..
وبدأت تفقد وعيها فطلب منهم ناجى يكشفوا وشها عشان تعرف
تتنفس...
وكانت الصدمة إنه يلاقيها حب عمره اللي تاه منه.. وكانت هى اللي
بتولد..

ناجى واللى كان في الأربعينات وقتها كان لسه مرهف المشاعر ...
وأكمل العملية وهو منهار تقريباً من العياط وسط دهشة الموجودين

لكن ولا حد منهم كان فاهم دا بيعيط ليه..
بعد العملية الست ربنا رزقها بالمولود وبقت بخير ...
ومشى ناجى من عند الراجل ورجع على بيته قبل الفجر ، وعلى باب
بيته قعد على الأرض وكتب الأطلال ...
في القصيدة ديه ناجى بيقول إنه بدل بعض الأبيات لحاجة في نفسه
، منها مثلاً إنه كتب :
(يا فؤادى لا تسل أين الهوى) وفي الأصل (يا فؤادى رحم الله الهوى) .
وبعدين كتب....

«يا حبيبي كل شيءٍ بقضاء .. ما بأيدينا خلقنا تعساء .. ربما تجمعنا

أقدارنا ذات يوم بعد ما عز اللقاء» ..
ناجى بعد كل الحب ده مكتفاش بدا كله ، إنما طلب من أم كلثوم
إنها تغنى القصيدة...
وجت أم كلثوم غنت «الأطلال» وقالت :
«هل رأى الحب سكارى مثلنا» ...
عشان تهز قلوب ملايين العشاق فى العالم جيل بعد جيل بعد جيل...
لكن محدش يعرف سر السحر اللى فى القصيدة والأغنية المستمد من
قصة حب حقيقية وصادقة

ربنا يرزقنا القدرة على الإحساس بالأشياء وقيمتها..
مش معنى إنك فيك الروح إنك تبقى عايش..
مش معنى إنك متجاوز تبقى بتحب وعايش حياتك ..
مش معنى إنك عندك ولاد تبقى أب....
مش معنى إنك بتتعب وبيطلع عينك في الشغل تبقى راضى..
مش معنى إنك بتاكل تبقى متذوق أو حتى مستمتع أو حاسس
بطعم الأكل ..
مش معنى إنك معاك فلوس تبقى فرحان وسعيد ..
مش معنى إنك ماشى على رجلك تبقى صحتك كويسة ..
مش معنى إنك بتحب وبتتحب تبقى سعيد ومحظوظ ..
مش معنى إنك بتضحك تبقى سعيد ومبسوط..
كلنا ماشيين وعلى آخرنا من كله.. وفينا الى مكفيننا من الحياة
والدنيا والناس ...
فيه فرق كبير بين عجلة الساقية الى إحنا مجبرين إننا ندور فيها..
وسط الهم والغم وسدة النفس والتكرار والرتابة اليومية والزهد ...
وبين إن ربنا يراضيك وتحس بطعم الأشياء وقيمتها ..
صدقنى لو رضيت ودوقتها هتحس إنك ملكت الدنيا والآخرة..
وقتها هتحس إن الخواء الى جواك إتملا برضا من ربنا..
ربنا يدوكم منها ويحسسكم بيها ويملى قلوبكم بالرضا ..
صدقونى.. وقتها هتهون عليكم مرارة الدنيا..

عجبتنى أوى جملة بومبا لما كان بيقول:
فيه حاجات فى حياتك لازم تتخلى عنها يا تيمون عشان تكسب
نفسك تانى ولو كانت أغلى حاجة فى حياتك)
ليه بيبقى فى حياتنا حاجات كتير غالية لكن مبنقدرش نستغنى عنها
على أمل إنها يمكن تحس بقيمةنا هى كمان...؟
ليه بنفضل جاينين على نفسنا فى حاجات كتير؟
زى جواز.. حب.. شغل.. صداقة.. أو أى علاقة تانية.. ؟
المسمى من وجهة نظرنا إنها حاجات غالية وقيمة فى حياتنا...
لكن فى الواقع هى مجرد حاجات بتستهلك طاقتنا بصورة شبه يومية...
وبتحولنا لكتلة بشعة من الطاقة السلبية الماشية على الأرض...
كل يوم نقول نصبر .. نصبر.. هتعدى ..
هيجى اليوم اللى تتجاوز فيه كل ده ...
بس للأسف كل يوم رجلينا بتغوص فى الوحل أكثر
لحد ما هيجى وقت هنلاقى نفسنا غرقنا وندفنا فى الطين..
العمر كله أساسًا يومين.. يا تعيشهم صح .. يا تخسرهم وتضيعهم
عشان حاجات متستاهاش ..
مش هقولك إن الفرحة هيزود عمرك ولا الحزن هيقضى على بقيته...
العمر واحد وربنا كاتبه..
لكن ليه بقى اليومين دول نقضيهم فى شد وجذب وصراعات وخناقات
وخذ وهات ووجع قلب... ؟
منعش اليومين المكتوبين علينا وإحنا على الأقل كسبانين نفسنا..
نحط رجلينا بس على أول السكة و نتخلى عن الحاجات اللى هتخلينا
نعيش اليومين دول فى هم ونكد...
إلحقوا نفسكم واسمعوا كلام بومبا...

دائرة راحتك أو (Comfort Zone)

هى منطقة فى حياتك أشبه بالسجن الى المفروض تهرب منه قبل ما يضيع عليه الخناق جواه ..

هى دائرة فى حياتك بترضى فيها بأى شئ .. لا عندك طموح ولا إبداع ولا حتى أهداف عشان تحققها ..

هى راحة مزيفة تمنعك من تجربة أى شئ جديد .. وبتمنعك من إنك تعيش حياتك الحقيقية..

كل أهدافك فيها إنك تكون مرتاح جوة الدائرة ديه بكل ما فيها من أمور روتينية، ووجوه مألوفة وإعتيادية ..

ما بتفكرش تعمل فيها حاجة جديدة .. ولا بيكون عندك أهداف محتاجة مجهود ومثابرة عايز تحققها ..

منطقة بتستسلم فيها لخوفك من المجهول، وبتفضل طول عمرك حبيس لمنطقة الراحة.

وديه طبغاً غير منطقة السلام الداخلى وديه حالة السلام العقلى والروحى الى بيعيشها الإنسان عشان يحافظ على التوازن وقوة النفس فى مواجهة الصعاب وصخب الحياة والتوتر..

عشان كده ربنا فرض علينا تعاليم كتير تخرجنا برة الدائرة ديه .. فى عز نومك « قوم صلي الفجر » ... فى عز طاقتك و أنت بتشتغل

وقف الى بتعمله « صلاة الظهر و سنة قبل و بعد » طاقتك نزلت و حاسس بالتعب « صلاة العصر وقبلها أربع ركعات »

تعبان و مرهق و عايز تنام « صلاة عشاء و سنة و شفح ووتر »..... فى عز عز نومك « قوم صلي قيام الليل »

إشتغلت و شغلك كبر و فلوسك زادت « طلع زكاة أكثر ».... شهوة الطعام و الشراب إعتدت عليها « صوم لحد المغرب »

مركز فى شغلك و حياتك العملية « صل رحمك »

فِي بَلَدِكَ مَسْتَأْنِسُ بِأَهْلِ بَلَدِكَ وَ أَهْلِكَ « وَمَنْ يُهَاجِرْ فِي سَبِيلِ اللَّهِ يَجِدْ
فِي الْأَرْضِ مُرَاعِمًا كَثِيرًا وَسَعَةً »

عشان كده جه الوقت عشان تخرج بره المنطقة ديه .. جه الوقت
عشان تبدأ الحلم من جديد...

عيش شغفك

دور على طموحك وإفتح الأبواب المغلقة اللى فى حياتك ...
كل ده بينتظرك خارج منطقة الراحة الخاصة بيك، عشان كده أخرج
براهها عشان تشوف الحياة اللى بجد .

على أد ما الحضن والسند والأمان بيعبروا عن الحب والرومانسية اللى
كل البنات بتحلم بيها ...

إلا إني من وجهة نظرى فأنا شايفهم مش مجرد أسماء ،

البنات ممكن ترددها أو تحلم بيها في شريك حياتها أو توأم روحها..

الحضن والسند والأمان مسئولية كبيرة البنات بتستنى من شريك
حياتها أنه يكون أدها ..

أد أيه سابت كل ما تملك وكل اللى هى عايشة فيه عمرها كله عشان
شخص واحد بعينه ..

وقد أيه إتعلقت بيه بالشكل ده من غير أى ضمانات ... ويا تصيب
يا تخيب ..

البنات بتستنى منك السند والأمان .. اللى هو ييفرق معاه سعادتها
وفرحتها ..

مايسبهاش في عز الأزمة والضلمة

بيكون موجود وبيفضل ماسك في إيديها وكأنها طفلة صغيرة خايف
عليها ..

في الوقت اللى بيعمل المستحيل علشان تظمن وما تبقاش شايفة غيره
ولا تلجأ لغيره ...

بيكون هو اللى معاه في ضرها يسندها ويدعمها ويقويها ويشجعها
...

الأمان إنها تشاركك التفاصيل الصغيرة من غير ما تحس إنك ممكن
تمل منها أو تعتبرها تافهة ...

البنات بتحط فيك كل أحلامها وآمالها وطموحاتها وهى مطمئنة إنك
عمرك ما هتخذلها ..

البنات بتحس بالأمان في صوتك.. في حضنك ... في خوفك عليها..

لإنها مش بتشوفك بس حبيب ... لا .. دى بتشوف فيك كل حاجة..

الأب والأخ والوطن ...

عشان كده بتستنى منك إنك تحس بيها وبوجعها .. الى بيبان من
نظرة عينيك أو من كلمة أو من لمسة إيديك ومسكتهم ...
إحساسك بيها هو الى بيهون عليها أى شئ فى الدنيا وبيقويها فى عز
ضعفها وقهرتها ...

بس لما تتجاهل كل ده وتخذلها وتحرق مساحات قلبها البيضاء...
بتتحول مشاعرها ناحيتك لرماد بتطيره الريح .. وبتبقى خيبة أملها فيك
كبيرة لا بتتكتب ولا بتتشكى ...

وبيبدأ قلبها يتملص منك ومن حبك شوية بشوية لغاية ما تبقى
بالنسبة لها غريب كأنك مكنتش فى يوم موجود فى حياتها
خليكم دايماً السند والأمان فى حياة بعض .. وإوعوا تخذلوا حد إداكم
مشاعر صادقة وشاف فيكم السند فى يوم ...

في واحدة من أفلام ديزنى على أد ما كانت قصة الفيلم بسيطة إلا إنها كانت مليانة معانى جميلة..

في فيلم نيمو كان عاجبنى الحوار جدًا وفكرته وطريقة توصيله لينا..
- دورى .. لو مكنتش قابلتك.. عمرى ما كنت هوصل لهناء.. متشكر
أوى ..

الجملة دى قالها مرهف ..سمكة البهلوان الحزينة في نهاية رحلته للبحث عن ابنه السمكة ((نيمو))الرحلة اللى خاض فيها أخطار وأهوال مكانش يصدق في نفسه أبدًا القدرة على إنه يخوضها.. في رسالة واضحة لقيمة الهدف الحقيقية في إخراج قدراتنا اللى إحنا نفسنا منعرفش عنها حاجة ..

قالها لـ((دروى)) السمكة الزرقاء عديمة الموهبة اللى بتعانى من مشكلة فقدان الذاكرة المتكرر..
واللى شاركته رحلته من البداية ..

- ايه ؟؟ ايه فيه ايه ؟؟ ... استنى .. رايح فين دلوقتى ؟؟ ..
- خلاص يا دورى .. أصلنا وصلنا متأخر .. نيمو ضاع .. وأنا هروح
دلوقتى..

كان يائس زى أى حد شاف حلمه خلاص قريب ، ولما وصله إكتشف إنه وصل بس لسراب مش أكثر..

هي كمان كانت حزينة .. برغم ان الحلم أصلاً مكانش بتاعها ..
بس ساعات مشاركتنا للناس في تحقيق أهدافهم بيكون دافعها إننا نفسنا فعلاً بنحس بقيمتنا من خلال نجاحهم هماغا..
مكانتش عايزة تصدق إن الواقع طلع عكس اللى إتمنته .. رفضت
تقتنع ..

- لأ .. لأ متروحش ..استنى ..
كانت بتزعق عشان يقف وهى بتترجاه .. الحزن غطى على نبرة

صوتها..

- أرجوك متمشيش .. أرجوك ..

حاولت تدي لنفسها وتديله أى مبرر يخليه يفضل ..

أى دافع يخليه يحلم حلم تانى حتى ولو مش مهم عشان تشاركه فيه

- أنا محدش فضل معايا كتير زيك كده ..ولو مشيت ؟؟؟ .. لو مشيت

... ؟؟؟

نسيت أو معرفتش حتى تقوله إيه ؟؟ .. ،

مش كتير بنبقى عارفين أو مدركين فعليًا إيه هيا أسبابنا الحقيقية

ورا رغباتنا ..

مش كل حاجة فى الدنيا المفروض ندور وراها على سبب .. بغض

النظر عن إن ساعات فقدان الأمل بيخلى الواحد حزين حتى ولو

ناسى أو مش عارف سبب حزنه ..

جرب تسأل واحد بقاله فترة مخنوق عن سبب ضيقه .. هتلاقيه غالبًا

تايه ومش عارف يرد يقولك إيه بالضبط اللى عامل فيه كدا .. الأسباب

كلها بتتلاشى .. والحزن بس هو اللى يفضل ..

حاولت تدور على ميزة ..

- أصل أنا بفتكر حاجات كتير جدًا وأنا معاك بص .. ((بي شيرمان .. ٢٤

.. اتنين وأربعين))

العنوان اللى طول الفيلم كانت بتكرره .. بتغنيه .. وبتتفاخر بإنها

حفظاه .. أول ما فقدت ثقفتها فى الحلم .. فقدته ..

نسيت كل مصادر ثقفتها بنفسها ..

- آنا .. أنا فاكراها فعلاً ... أهيه على طرف لسانى .. عشان أنا .. أنا

... أنا أما بشوفك .. ببصلك .. با..بحس بأمان .. أرجوك ..مش عاوزه

الشعور دا يضيع منى .. مش عاوزه أنسى ..

الجملة الأخيرة دى فيها أقوى معنى بيلخص الفيلم كله ..

الإحساس بإن قدامك هدف بتسعى له .. أو انك شريك في تحقيق
هدف ..

شعورك بإنك مش كم مهممل بلا قيمة ..

شعور بإنك مش فارغ ..

فيه ناس بتتمنى يكون لها ماضى خاصته حتى ولو مؤلم ..

بس أفضل بكتير من ألبوم صور فاضى يبصوا يلاقوا نفسهم لوحدهم
فيه ..

أفضل من صفحة بيضا مش لاقين اللى يكتبوه عليها ..

وفيه ناس بيتمنوا صفحة حياتهم كلها تتمسح ..

بيتمنوا الصور الزحمة كلها تفضى .. زيه هو ..

كان عكسها.. نفس الشعور .. بس الرؤية مختلفة ..

- النسيان يا دورى .. هو دوايا ..

الثقة فى الحب هى أجمل ما فىه ...
الثقة فى اللى بتجبهه هى اللى بتخليك تنام كل ليلة ...
وإنت متأكد إن الحب هو اللى بيجمعكم وهيفضل يجمعكم ...
الثقة فى اللى بتجبهه هى اللى بتخليك واثق إنه هايفضل عاشق لىك ..
حتى لو شاف وعرف وإتعامل مع كتير غيرك ممكن يكونوا أفضل
منك ..
بس هو دايمًا بيبقى شايفك أحسن وأجمل حد فى حياته ...
الثقة فى اللى بتجبهه إنك تديله الحرية من غير ما تخنقه ولا تحط
له قيود ..
وإنت متأكد إنه مهما بعد ومهما إختلفتوا هيرجع لك ..
مش لأنه مجبر ..
أو حتى غضب عنه ...
لكن لأن قلبه هو اللى بيحببه ويشده لىك فى كل مرة لإنك مش
بتهون عليه ولا على قلبه ..
الثقة هى اللى بتخليك متأكد إنه عمره ما هيقدر يفرح من غيرك ..
إنك تكون واثق إنه دايمًا هىكون وفى لىك ..
وإنه هىختارك عشان تكون موجود معاه فى كل لحظاته ...
إنك تكون واثق إنه عمره ما هىخذلك مهما كان ...
وإنه دايمًا هيبقى واقف جنبك وييدعمك ..
الثقة هى جوهر الحب

لمايجى وقت الإرتباط .. حاولوا ترتبطوا بناس بتبتسم على الصبح...
ناس اما تشوفك تبتسم لك ولو فيها اوجاع الكون..
ناس بسيطة بتحب القهوة والموسيقى والسينما والكتب ..
ناس عندها شخصية وببسمعوا وبنناقشوا وبيتكلموا ..
ارتبطوا بناس واضحه ومش متكلفة.. ناس على طبيعتهم ..
ارتبطوا بناس معندهاش أسرار وعقد ..
ناس مش غامضة ومشاعرها غامضة وحياتها كتاب نصه محروق ..
ناس إيجابية ومتفائلة مش ناس عندها طاقة سلبية تحرق الكون
حواليها ..

ناس مش بخيلة فى المشاعروالمال وحتى فى الكلام ...
ارتبطوا بالطيبين الى مش بيثيلوا فى قلوبهم حقد ولا كراهية لحد..
ارتبطوا بناس عارفة قيمتكم وقيمة العلاقة ...ناس قادرة وعايزة
تحتفظ بيكم ..

ناس مستعدةإنها تبيع الدنيا مقابل ولو لحظة رضا منكم ..
ناس يهمها زعلكم وتفرق معاها إبتسامتكم ..
ارتبطوا بناس فاهمة نفسها وعارفة وشايفة طريقها وعندها هدف..
اتجوزا ناس سعيدة بتعرف تصنع السعادة لكل الى حواليها
مش ناس تيجى تشتكلهم يقولو لك :

بس ونبى مش عايزين نسمع..احسن بتنقل لى طاقتك السلبية
إرتبطوا بناس وجودها مبهر و كلامها مبهر واساليها فى كل مبهرة ..
ناس بتعرف تحاصرکم بحبها .. وبتعرف تفاجئكم بكم الجمال الى
جواها ..

تأسركم بجمال روحها ..

مفيش أجمل من الحوار ده في فيلم «خلى بالك من عقلك»
وهو بيضمن حبيبته إنه هيقبلها بكل عيوبها وكل ما فيها ..
كان بيظمنها إنه هيقبلها زى ما هى ،
وإنه هيستحملها زى ما هى كمان هتستحمله ...

- بحبك ..

- بحبك ..

- تقصد هتتحملني ؟

- مش فاهم !

- أنا كلي عيوب !..

- أنتِ جميلة .

- مش جميلة أنا عصبية ومتسرة وساعات بكون غبية وخوافة..
أنا بزعل وبسكت وبعبد ومش بعاتب، أنا صعب تفهمني وتعرف
مالي لأن أنا مبقتش عارفة مالي ؟
أنا منطوية وكثيية وحزينة ودمي ثقيل وتعبانة وبصدع ديمًا
الصداع بيقتلي يومي بيخليني أقولك بكرهك وأنا مش بكرهك،
مش اجتماعية ومحبش الأختلاط وبغيير أووو ..
وبقفل على إيلي بيحبوني بترباس وهخنقك ومش هتعرف تتنفس،
أنا بيعيط ومش بتكسف من ده ممكن أعيط في الشارع قدام الناس أو
وأنا باكل أو وأنا بضحك حتى،
أنا مش ببدأ هتحسني باردة مع أي مش كده بس معنديش طاقة
أبدا أي حاجة فاهم ..

أنا بطيئة وإيلي عاوزني لازم يتحمل ويحاول معايا مرة وأثنين وعشرة
وميزهقش لإني بخاف أسلم قلبي لشخص ..

أنا منطوية ومنعزلة وروحي مش حلوة ولا حاجة

روحي متبهدة حزن وكسر خاطر وخذلان... وعيوب كثير..

أنا صندوق أسود مقفول أرجوك متفتحوش
لإنك هتجرب وأنا هحاول أديك فرصة عشاني لإني محتجاها يمكن
أكون أحسن ..

يمكن تكون أنت المختلف إلى روحى مستنياه..
بس أنت هتزهق وأنا هفتح صندوقى عالفاضي ومش هينوبنى غير
الوجع ...

- خلصتى...؟
- أيوة ..هتمشى صح ..؟
- هنمشى صح ..
- لوحدك ..؟
- لوحدنا ..
- شيل النون ..
- لاء ..
- ليه ..؟
- لإني بحبك ..
- تقصد هتتحملنى ؟
- مش شايفك عبء .. ينفع أطمنك ؟
- طمنى ماشى

كل واحد فينا ربنا إمتحنه ببلاء مختلف عن التانى ...
كل واحد عنده نوع ابتلاء ربنا باعته له لسبب ما..
فيه المبتلى بمرض.. وفيه الى ربنا إبتلاه بموت حد قريب ليه..
فيه المبتلى بطلاق.. وفيه المبتلى بعدم الزواج..
فيه المبتلى بزواج كله مشاكل.. وفيه المبتلى فى ولاده..
فيه المبتلى بقله الرزق.. وفيه المبتلى فى ماله ...
فيه ابتلاءات كتير فى كل بيت ومحدش يعلمها إلا علام الغيوب..
ربنا لما بيبتلى حد بيبتليه على قدر تحمله و صبره على الابتلاء..
لو كانت الدنيا سهلة ميسرة مكنش الصبر هيبقى واحد من أبواب الجنة .
عشان كده وأنت بتتعامل مع أى شخص إعرف إنه فيه اللى مكفيه
زى ما أنت فيك اللى مكفيك..
براحة على الظنون..
ورا كل باب مقفول فيه قصة أم..
ورا كل ضحكة لحد بتحسده.. فيه خنجر بيدبح قلبه..
كلنا مبتلين والله العظيم..
وكلنا بنتعكز على الصبر عشان نقدر نعيش ونكمل ..
قيل لأحد الصالحين : ما هو الصبر الجميل ؟
قال : أن تبلى وقلبك يقول « الحمد لله »
المهم فعلاً إن قلوبنا تكون مليانة بالصبر والرضا ولساننا بيردد
« الحمد لله »..
ربنا يفرج عنا كل هم وغم وابتلاء

في فيلم «Me Before You» اللي ميترهقش منه البطل كان مُكْتَتَب
دايمًا بسبب أنه عمل حادثة وبقي عاجز عن الحركة وهيفضل لآخر
عمره مثبتت على كرسى مُتَحَرَك ..

وقتها البنّت اللي كان بيحبها كان لازم تختار ما بينه وبين حياتها... وانتظر
أنها تقف جنبه في محنته إلا إنها إتخلت عنه وراحت عملت علاقة
مع صديق مشترك وإتفقوا على الجواز وكمان عزموه على فرحهم .
في حفل زفاف حبيبتة على صاحبُه راح حضر ومعاه الممرضة بتاعته،
اللي كان من واجبها إنها متسيبوش لحظة..

وقتها لاحظت عليه إنه مبيتكلمش ، ملامحه واجمة وآثار شدة الحُزن
والاكتئاب كبرته عشرات السنين على عمره..

الممرضة مسكتتش فراحت طالعة على الكرسى المُتَحَرَك وقعدت فوق
رجليه وقالتله تعال نرقص سوى.. وقالت له:

- إنت مش هتعيش غير حياة واحدة ، فَحاول تفرح فيها على قد ما
تقدر .

هنا بصلها وإبتسم وقام مشى بالكرسى المتحرك وهو شايلها على
رجليه ،

ورقص بيها وسط إنبهار من كل الحضور.

مش بس كده ... ده كلامها ده خلاه يبتسم ويضحك وينطلق معاها
بالرغم من عجزه ..

ناس كتير مننا موقفه حياتها على ناس تانيين سابوهم وراحوا لغيرهم

..

وبيفضلوا فاكريتهم بالرغم من إن الناس ديه نسيتهم وراحوا لغيرهم ..

متوقفوش حياتكم على حد.. إفرحوا.. عيشوا..

كملوا حياتكم مع غيرهم..

متخلوش حد يكسرکم وهو يفرح..

وإعرفوا إن في الوقت اللى إنت هتقعد تبكى وتملى عيونك دموع ..
ممکن يعدى عليك شخص يكون هو دوا قلبك وروحك.
شخص يقدرک ويعرف قيمتك ويحافظ عليك ...
افتحوا قلوبكم بس خلوا المفتاح فى إيديكم ...

الحب مش مجرد كلام بيتقال ..
كلمة « بحبك » كلمة سهل أوى إنها تتقال عند معظم الناس ..
لكن مش كل اللى بيقولها بيبقى صادق فيها ..
مش كل اللى بيقولها بيبقى مستعد يتحمل مسئوليتها ..
مش كل اللى بيقولها بيبقى فاهم إن الحب إهتمام ورعاية ومسئولية

..

الحُب .. سؤال .. غيرة .. خوف .. رحمة .. حرص .. مودة .. دفا ..
الحب سند .. الحب أمان .. الحب ثقة ..
قبل ما يكون مجرد كلمة بنقولها ونكررها ..
اللى بيحب بجد بيبقى صعب عليه أوى ينطق حروفها ..
لأنه فاهم مسئولية الكلمة ..
اللى بيحب بجد هتقراها فى عينيه من نظراته ..
من خوفه على اللى بيحبه ..
يمكن الكلمات تكذب أو متقولش الحقيقة ..
لكن العيون والقلوب مستحيل تكذب ..
العيون مراية للحب .. والأفعال مراية للحب .. حتى نبضات قلب اللى
بيحب اللى بتبقى مسموعة ...
باختصار الحُب .. هو مزيج من إحساس نقى وأفعال صادقة ..

من أروع المشاهد في فيلم City of Angles ... في لقطة من الفيلم كانت
Meg Ryan راكبة دراجتها كانت فاردة ذراعها بسلام للكون ورافعة
راسها في رضا تام...

كانت سايبه الدنيا ورا ضهرها بعد ما ملكت في لحظة الدنيا بأسرها
مع اللي بتحبه ...

لكنها لاقت نفسها في مواجهة حتمية مع الموت..

نظرتها للموت وقتها كانت نظرة غريبة ..

نظرة كلها رضا.. سلام .. أمان ...

وكأنها بتقول تقول خلاص ...

أنا راضية ...

رضا .. سلام .. طمأنينة.. وسكينة غريبة تخليك تقف قدامها وتتعجب
كثير.. ..

مين مننا مش بيتمنى نهاية مسالمة زي ديه ...

نهاية مفيش فيها جزع .. ولا صراخ .. ولا ألم ..

بس سلام .. رضا .. سكينة ...

وده مش بيتحقق إلا لما نتخلص من عنت الحياة ديه وثقلها..

لما نتصالح مع أنفسنا ومع غيرنا..

لما نرضى الخالق من غير ما يهمنا آراء وأقوال الآخرين..

لما ندرك إن العالم لا يستحق كل هذا العناء والحزن..

يكفيننا من الدنيا لحظات من الصدق نعيشها من غير زيف أو تلون..

لحظات نعيش فيها زي ما إحنا بالفعل

مش زي ما لازم أننا نكون أو زي ما الآخرين عايزنا.

أحيانا تصيب الحياة قلبك بجرح قاتل
تشعر معه وكأن الحياة قد توقفت من حولك
وكان كل شئ قد أصابه الشلل والجمود
وكان الحياة من حولك أصبحت صورة فوتوغرافية ملتقطة لتلك
اللحظة فقط
فإذا بالحياة تستمر وإذا بالناس يمارسونها وكأن شيئاً لم يحدث وكأن
جرحك النازف غير مرئى
وإذابك تتساءل...
هل إنتهى كل شئ...
هل كان كل ذلك العذاب لى وحدى
ألم يشعر العالم من حولى بشئ
هل يجب أن أسير فى حياتى وكأن شيئاً لم يكن
هل يتعين على أن أتكلم وأضحك وابتسم دون أن يبدو على شئ
هل سيظل طيف ما حدث يلاحقنى فى صحوى ونومى
تحاول أن تصرخ لىسمع صريخك أحدهم
يتحطم قلبك.. تموت روحك رويداً رويداً
تذبل فىك الحياة وينطفئ وهجها
ولا تملك تلك اليد التى تمتد إليك سوى أن تخفف بعض من ذلك الالم
لعلك تستطيع أن تعيش..
او بمعنى أدق تتعايش...

حينما تحب حب صادق حقيقى..
قد تعجز حتى عن مجرد التعبير عنه
تشعر انك عاجز عن ان تشرح مشاعرك للطرف الاخر
فلا تستطيع ان تخبره انك تعشقه او ان قلبك ينبض باسمه فقط
او انه اصبح بالنسبة لك الحياة بما فيها
لا تستطيع ان تشرح له انك عاجز عن التنفس بدونه..
ان قلبك يتمرّد عليك في غيابه وكأنه يعلن عليك العصيان
وان روحك ترفرف لتنهفو اليه بعيدا عنك
وحينما يغضب ويبتعد تشعر وكأن روحك تمد إليه يدها تسأله البقاء
وتعتذر منه ولو كان مخطئاً
وتشرح له كل شئ لتزيل أى خلاف بينكما
ولكن لسانك يبقى صامتاً وعينيك شاخصة وكأنك تمثال قد من صخر...
إنه عقلك
عقلك الذى يصرخ بك انه لو كان أحبك بقدر ما تحبه لبقى دون ان
تسأله البقاء
لو كان يحبك لفهم دون ان تشرح أو تبرر..
لوثق بك وبمشاعرك اكثر من ثقته بنفسه وبمشاعره
ويظل قلبك وروحك مع عقلك في صراع طويل..
لتبقى انت وحيداً كسيرا تنتظر الغلبة لاحدهم
أو تنتظر حبيباً غاب وتركك لتعانى وحدك ويلات ذلك الصراع...

ربما يكون من الصعب أن تتوقع أن يجرحك أو يكسرك أو يخذلك أقرب
الناس إليك..

وبالرغم من ذلك تظل تكابر وتعاقد وتتمنى لو أنك مخطئ أو سئ
الظن.

ولكن الأصعب أن يفعلوا ذلك بك بالفعل ...

بالرغم من توقعك إياه دون أن يلتفتوا إلى جرحك النازف..
أما الأكثر أماً هو أن تظل تكابر وتتظاهر بأنك بخير.. لم تتأثر

لتواجهك الحقيقة التي لطالما كنت تهرب منها

إنهم كانوا كذلك منذ البداية..

أنت فقط من كنت تتعاطى للحفاظ عليهم..

لقد أخبرك قلبك منذ البداية بالحقيقة ..

ولكنك رفضت الإستماع إليه ..

أنت من كان يتلمس لهم الأعذار في كل مرة ..

كنت تريد أن تكمل معهم الطريق ...

ولكن الحقيقة تبقى ساطعة لتتغلب على كل أوهامك التي صنعتها

بيديك ..

ولتظهر ما خفى من بواعث تلك النفوس والقلوب..

فلا تتجاهل نذير قلبك ..

وإستمع إليه دون تردد..

فهو دائماً يخبرك بالحقيقة...

واحدة مخطوبة والدها توفى فجأة.. اتصلت بخطيبها بلغته الخبر ..
قالها «البقاء لله» وقفل ، وبعد أسبوع إتصل ..
قالها كنت مستنيكي تهدي عشان نعرف نتكلم.. قالتله خلاص كل شئ
قسمة ونصيب ...
لإنه ماكنش موجود في أكثر وقت كانت محتاجاه فيه ..
مرة واحد كان بيعمل ذنوب على طول.. وقال قررت أتوب من بكرة
.... ماالات
كلنا عارفين حكاية الاتنين الجيران اللى حبوا بعض من غير ما حد
يقول للتانى ..
ولما أخيراً هو قرر يتحرك لقاها اتخطبت لإنه إتأخر...
شوف كام حد قولت هصحى أكلمه ... هصالحه ... هروحله هجييله
....
وإتأخرت لحد ما ضاع الوقت...
طب شوف كام مره استنيت رسالة من حد .. رنة .. زيارة .. دعوة ..
ضحكة

وبتمشي لما تلاقيه إتأخر لإن الشغف إنتهى
هو إحنا ليه دائماً متأخرين..
ليه بنسنتى لما الزعل يخلص والعتاب يبقى بارد والفرحة تنتهى
والضحكة تبقى باهتة ..
ليه بنسنتى لما الحبال تدوب.. واللى بينا يفقد قيمته وجماله ...?
يا نكون قد العلاقات اللى بندخلها يا بلاش ندخلها أصلاً ..?
سواء صداقة .. أخوة .. قرابة .. زواج .. ارتباط .. أيًا كانت العلاقة...
يا تقدروا المكانة اللى الناس بيحطوكم فيها ...
يا تسيبوا المكان لحد أولى منكم يستاهله ويشيل مسؤوليته..

في فيلم «Me Before You»

البطلة كانت بتحكي للبطل انها كان عندها شراب مخطط اصفر في
اسود

وكانت بتحبه جدا و فضلت تلبسه لحد ما باظ و داب وعمرها ما
لاقت شراب زيه للكبار..

المهم في يوم عيد ميلادها جبلها شراب زيه بالطبط..
الفكرة مش إنك تلاقى حد يجيبك اللى انت عايزه أو يلبى لك
طلباتك..

الحاجة اللى بتتطلب ما بيقاش ليها طعم او معنى
الفكرة مش في كلام حب بيتقال تحس انها مجرد حروف بتتنطق..
الفكرة مش في كتر الناس اللى حواليك من غير ما تلاقى حد يحس
او يهتم بيك بجد

حد يهमे انت بتحب ايه وبتكره ايه...

بترتاح لإيه بتضايق من ايه...

وايه هى الحاجات اللى بتفرحك

حد بيهتم بتفاصيلك الصغيرة اللى ممكن انت نفسك ما تخذش بالك
منها...

الفكره هنا ان يبقي عندك حد مركز في كلامك و تفاصيلك

و في الحكايات التافهة اللى بتحكيها ..

و فاكرها دايما و بيحاول يفرحك بحاجات جبت سيرتها بحماس وسط
الكلام... .

او بمعنى اصح

He remembers , he cares

الفراق من أصعب المشاعر اللى ممكن تعيشها فى حياتك ..
بتحس إنك بتستأصل جزء منك ..
بتحس كأننا بنوصل للدنيا عشان نفضل نفارق أغلى الناس
وبس..

أصحابنا .. أحببنا .. حد إتعلق بينا وإتعلقنا بيه ..
إوعى تكون فى يوم سبب فى الفراق ...
عشان متعيش ندمان على حد غالى ضيعته من إيدك فى لحظة طيش ...
إوعى تخلى الفراق خيارك إنت ..
ولو لازم تفارق ..إوعى تسيب وراك جرح ما يتدواش
إوعوا تخذلوا حد لجأ ليكم ..
قربوا منه..

متبخلوش على حد بكلمات الحب لإن ممكن فى يوم تتفاجئ ومتلاقهوش..
وقتها هتعيش عمرك ندمان ومش هيبقى فيه فرصة للرجوع ..
متضيعوش حياتكم فى الشحن والكره والتفكير اللى هيتعبك ويتعب اللى
حوالك..

حاول تكون لىك بصمة كويسة فى حياتك وحياة كل اللى يعرفك..
وخليك مؤمن دائماً إن الفراق نصيب.. والبعد نصيب.. والموت نصيب..
لكن برضه اللقاء نصيب..
حاولوا تعيشوا.. تفرحوا... تكونوا سبب بسيط لسعاده أى حد حوالىكم...
بكلمة.. موقف.. إحسان.. حب.. أى موقف نبيل..
محدث ضامن بكره..

السكوت ليس علامة رضا..
السكوت ممكن يكون علامة للضعف وقلة الحيلة والعجز
السكوت ممكن يكون علامة على عدم المبالاة ويمكن عدم الثقة في
جدوى الكلام ..
السكوت ممكن يكون جبن وخوف ..
السكوت ممكن يكون يأس واحباط من الأوضاع اللى حوالينا ..
السكون بيحصل لما نواجه صدمات ما ينفعش معاها الكلام ..
السكوت علامة على إن طاقتنا إستنزفت ..
السكوت دليل إننا تعبنا وإننا شايفين إن الكلام مش هيغير شئ ..
إحنا بنسكت لما بنتعب من الشرح والتبرير والعتاب..
بنسكت لما بندبل وقلوبنا بتتعب وتستسلم ..
بنسكت لما بنحس إن مشاعرنا بتموت وبتنزوى...
بنسكت لما بنشوف الأمل بيموت وأحلامنا بتروح لحد تانى عمره ما
حلم بيها ...
بنسكت وإحنا جوانا كلام كثير ما بقاش ينفع يتقال ...
السكوت عمره ما كان رضا ...
السكوت هو إستسلام لأوضاع كثير أكبر من طاقتنا على التحمل ..
لكن الرضا هو الهدوء والتوازن النفسى ..
الرضا هو حالة التصالح مع النفس ومع الدنيا والناس ..
إحنا بنرضى لما بنعرف حقيقة الحياة والناس ..
وإن ما فيش مخلوق بياخذ أكثر من نصيبه ... ولا بيعيش غير قدره
المكتوب عليه..

الرسول كان يقول للناس على سيده خديجه: (إِيَّيْ رُزِقْتُ حُبَّهَا)..
الرسول لما نزل عليه الوحي وكان خايف مراحش غير للسيده خديجه
وحكالها ..

والعام اللي ماتت فيه سُمِّي بعام الحزن من شدة حزن النبي عليها ..
وكان لما بيدبح شاه يقولهم أرسلوا بها إلى أصدقاء خديجه وفاءً لها...
الرسول في ساعة حادثة الإفك لما بعض المنافقين اتهموا السيده عائشه
بالزنا...

قعد شهر كامل بيسمع كلام الناس وهو صابر ومستحمل عشان ما
يجرحهاش...

الرسول كان بيخلى السيدة عائشة تاكل الأول أو تشرب من الإناء
وبعدين ياخده منها..

ويشرب أو ياكل من نفس المكان اللي هي أكلت أو شربت منه
في مرة لما الجمل بتاع السيده صفيه اتأخر عن باقى القافلة وبَرَكُ
على الأرض في نص الطريق وهى عيطة ..
الرسول وقّف القافلة كلها ورجعها وقعد يمسح دموعها بايديه
ويطيّب خاطرها ..

في مرة الرسول كان خارج في قافلة ومعاه السيدة عائشة، فقال للناس
تقدّموا وتسابق مع السيدة عائشة فسبقتة....
بعدها بفترة خرجت معاه في قافلة تانية فقال لأصحابه تقدّموا وقالها
سابقيني...

فتسابقوا فسبقها وقعد يضحك ويقولها هذه بتلك ...
الرسول كان بيقعد على الأرض ويثنى رُكبتة للسيده صفيّة عشان تركب
على ظهر الجمل بتاعها
الرسول كان بيخرج مع زوجاته للتنزّه ..

وكان بيساعدهم في شغل البيت وبيخيّط النعل اللي بيلبسه والثوب

الى يرتديه...

الرسول عمره ما ضرب زوجه من زوجاته ولا أهانها ...

وكان لما يسافر وياخذ زوجاته معاه والراجل الى بيقود القافله يسرع

كان بيقوله

«رفقاً بالقوارير»

الإسلام كرم المرأة ... والرسول ضرب لنا أفضل مثل وقدوة في إحترامها

وإكرامها ..

فرقاً بالقوارير...

فيه شخص ممكن يأذيك بدون قصد لأنه بيحبك
وفيه شخص ممكن يضحى عشانك ويضيع معظم سنين عمره عشان
بيحبك..
وفيه شخص ممكن يغير حياتك للأحسن لأنه بيحبك وعائزك تبقى
أحسن حد ..
وفيه شخص ممكن يهدمك ويدمرك بحجة إنه بيحبك ...
وفيه شخص بيخنقك ويقيدك عشان يتملكك لأنه بيحبك ..
وفيه شخص بيحاوطك بغيرة وشك وقلق دايم تحت مسمى الحب..
وشخص بيأسرك بحبه وحنانه وإحتوائه ويحميك من تقلبات الأيام
وقسوتها لأنه بيحبك ..
وشخص ممكن يقتلك بأسم الحب
وفيه شخص موهوم أنه بيحبك وهو لا حَب ولا عَرَف معنى الحب..
وشخص فاكر أنه قدم كل شئ لحبيبه وهو ماقدّمش إلا العادى ويمكن
أقل ..
وشخص فاكر إن كل اللى عمله مش كفاية رغم أنه عمل كل اللى
يقدر عليه واللى ماחדش عمله..
الحب قوة ناعمة لكن غاشمة...وجاهل اللى يستهين بالقوة دى..
ومسكين اللى مآمنش بيها .
دى قوة بنهد وتبنى وتسلب وتوهب ، وتسعد وتتعس ، وتحى معانى
وتقوم حروب ...
الحب ممكن يبقى أحسن شئ فى الدنيا وممكن يبقى أتعس وأسوأ
شئ ...
عشان كده ماتحاولوش تلاقوا تعريف للحب..
لأنكم مش هتلاقوا ..
لكن إجتهدوا جدًّا فى إختيار الشخص الصح اللى تحبوه بجد وتتحبوا

منه بجد ...
وساعتها هتعرفوه كويس
الحب الحقيقي مايتوصفش ..
بس هاتعرفوه كويس جدا من خلال الشخص الصح ..

الثقة على أد ما هى بتريح فى أى علاقة ... على أد ما هى قادرة على
دمارك وأذيتك ..
مين فىنا الثقة الزائدة فى الناس مكنتش قادرة إنها تبوظ حياته أكثر
من مرة..
الثقة بتأدى لما بتوثق فى ناس متستاهلش ثقتك..
ناس ضيعوا معنى الكلمة الجميل اللى بقى طعمها مر فى حلقك..
الثقة بتأدى لما تبطل تثق خالص فى أى مخلوق ..
فضيحت منك فرصة القرب من الناس اللى تستاهل فعلاً الثقة
وتستاهل تكون جنبك ..
بدون الثقة هيكون صعب عليك تشعر بالأمان
وممكن تفضل فى شك طول الوقت ..
العلاقات عالم ملئ بالجنون والشغف والمغامرة والثقة هى الأساس
اللى بتتبنى عليه أى علاقة ..
ولو الأساس ضعيف أو مش صح ..
العلاقات اللى إتبتت عليها هتنهار..
عشان كده الثقة هى مفتاح إستمرار العلاقات وقوتها ..
ليه مش بنقدر الثقة ونحافظ عليها ..
ليه بعض العلاقات البشرية قادرة إنها تحطم موروثات السعادة
والبهجة...؟
وليه ما بناخدش حذرنا وندفع ورا قلوبنا ونثق فى اللى حوالينا من
غير تفكير ..

هو انت انسان ناضج..؟
هل عدت عليك المرحلة اللى بتبدأ العشاوه تنزاح من على عيونك
وتكتشف حقيقة الأشياء اللى حواليك..
الاقنعه المزيفه هتقع..
بريق الذهب بينطفي..
الحاجات المزيفة بتظهر..
الأصحاب الفالصو.. والشريك المخالف الفالصو برضه..
المشاعر الكدابة واللى اهلكتك واستهلكتك..
اللمة الكدابة اللى وقت الزنقة مش هتلاقى حد منهم ..
ووقت لما تعدي ازمتهك بيظهروا ويقولوا متخافش احنا في ضهرك..
لما توصل للمرحله دى هتحس إنك وحيد كئيب ..
قدرت تبعد عن زيف مشاعر اللى حواليك.. يعنى خسران..
لو بصيت لها هتلاقيك فعلاً خسرت كل دول لكن كسبت نفسك
وراحتك..
كسبت شخصية جديدة جواك..
شخصية عاقلة قوية عارفة تفرق بين المشاعر الصادقة من الكدابة
وقادرة تميزها..
قادرة على إنها تاخذ قراراتها من غير توتر ولا ضغط على الاعصاب..
والأهم خطواتك بقت محسوبة..
مبقاش سهل إنك تقرب من حد أو حد يقرب منك إلا بالصح..
عارف دى بقى اللى اسمها مرحلة النضج..
وقتها هتبقى فعلاً انسان ناضج..

أغلى رسالة تاريخية بيعت فى مزاد علنى فى دار كريستيز بلندن هى..
الرسالة التى كتبها نابليون لزوجه جوزفين أثناء حربى على إيطاليا
سنة ١٧٩٦ م :

«لم يمض يوم دون أن أحبك..لم أقض ليلة دون أن أفكر فىك..
لم أتناول فنجان شاي دون أن ألعن المجد والطموح اللذين يجعلاننى
بعيداً عن روح حياتى..
وسط انشغالاتى.. وأنا أقود الجنود.. وأجوب المعسكرات.. وحدها
عزيزتى جوزفين تقبى فى قلبى..
تحتل روحى..تشغل تفكيرى..
إذا كنت قد ابتعدتُ عنك بسرعة جريان نهر الرون..
فلكى أعود بسرعة لأراك..
إذا كنت أستيقظ ليلاً لأعمل..
فلكى أستعجل عودتى لرفيقة عمرى الرقيقة».

الأمان مش مظاهر كدابة .. أو حتي كلام وردى بدون فعل
الأمان أعمق وأهم وأبسط من كل ده بمراحل ..
الأمان إن كل واحد في العلاقة يبقى عارف إن الثاني هيفضل موجود..
هيبقي جمبه وقت احتياجه..
الأمان إنكم وقت ما تتخانقوا تبقوا عارفين إن محدش هيفهم الثاني
غلط مهما كان حجم وسقف الخلاف
إنكم تبقوا واثقين ان محدش هيجرح الثاني ..
وإن دا مجرد خلاف بسيط هيروح لحاله.. وهتفضلوا دايمًا مع بعض..
الأمان إن كل واحد فيكم ميبقاش خايف.. إنه يقول اللي جواه من غير
ما يلاقي الثاني إتحول لقاضي بيحاكمه ..
الأمان إن كل واحد يبقى واثق إنه مهما زعلتم من بعض مجرد ما
حد فيكم هيجتاج الثاني هيلاقيه..
مش علاقة على كف عفريت، كل واحد بيحاول يسندها عشان
متقعش، ووقتها كل واحد يروح لحاله..
الأمان يا جماعة هو كل دا وقبل دا كله الأمان هو نظرة عين بتقولك
أنا هنا.. أنا موجود عشانك.. أنا فاهمك صح ..
والأجمل من دا كله أنا مستحيل أخذك..
الأمان.. هو الحياة والثقة والتفاهم والإرتياح وأفعال كل تفسرها أنا
جمبك..
الأمان والإحتواء أعظم إحساس ممكن المرأة تحسه من ناحيتك..
يخليها تبيع الكون عشانك ولا هيهمها غيرك وغير رضاك..
ياصديقى الأمان لو شريكك حسسته معاك طول ما هي مطمئنة
هتكمل ..
وأول ما تبدأ تخاف بتبدأ تبعد..
لو حسست بالأمان معاك .. خلاص كده هتملك كل ما فيها .. قلبها وعقلها

وكيانها كله..

حسسها بالأمان وهي هتعيشهولك في أروع صوره وأشكاله..

طمنها بوجودك مش تهددها بغيابك..

وكل ما كانت عينيك سكن ليها .. هتكون روحها ملجأ ليك .

الشخص الاناني ده أسوأ شخص ممكن تتعامل معاه ...
مايشوفش نفسه غلطان ...ولو اعترف بغلطه فعنده دايماً تبرير لكل
غلطة...

مايعترفش أبداً بأى عذر ولو شخص قصر فى حقه ،وعنده مليون مبرر
لتقصيره وإهماله ..

برده هيبقى شايف نفسه الوحيد إالى اتوجع وتعب فى الدنيا و إن
ماحدث غيره يستاهل الإهتمام و الحب ...
مبيحبش انك تسأله عن أى تصرف بيعمله .. لكن عادى لو هو
يسألك..

مايفكرش غير فى همومه حتى لو بتموت قدامه ...
هيتضايق إنك مش جنبه وهيعاتبك وما يفكرش حتى فى اللى بيموتك
.....٥٥

من الآخر كدا والمهم إبعدوا عن الناس دى..
شكلهم حلو من بعيد ...
لكن لما تقربوا منهم بتشوفوا كم الأنانيه إالى فى طبعهم..
إبعدوا قبل ماتكتشفوا إنكم مسجونين مع شخص ما بيفكرش غير فى
نفسه وبس..

فى حياته ومصلحته هو و بس..فى همومه ومشاكله هو وبس ...
ابعدوا ولو هتعيشوا حياتكم كلها من غير حب..
ده أهون مليون مرة من إنكم تعيشوها مع شخص بيستنفذ كل طاقتكم
ومشاعركم ..

أنا نفسى عرفت أشخاص قمة فى الانانيه وحب الذات وياريتهم حاسين
بنفسهم

ابعدوا.. وإتعلموا أنكم تعيشوا لوحدكم لو مفيش قدامكم غيره ..
إتعلموا أنكم تتوقعوا غياب أقرب الأشخاص لقلوبكم..

أنكم ما تركضوش متلهفين ورا كل اللى بتحبوهم.
أنكم تبكوا من غيرما يحس ببيكم حد ...
إتعلموا تقسوا.. عشان تعيشوا ..

دائماً هتفضل تتمنى شخص معين وهتفضل تطلبه..
هتفضل تقول يا هو يا بلاش ،
هتفضل تشوف الدنيا في ملامحه..
والسعادة والدنيا في ضحكته وبكرة اللى جاى يجرى في عيونه هناك أهو..
هتفضل لحد ما تحس إن طاقتك بتخلص ..أنهكت لحد آخر قطرة دم في قلبك..

وبرضه هتقاوح وتحتار بين إنك تمشى أو تفضل ..
يا ترى لو مشيت هيمسك فيا ويقول استنى ولا هيسكت..
طب لو سكت خالص هل السكوت ده معناه استنى ولا امشى..?
طيب لو فضلت فيه حاجة هتتغير...!؟
ولو جيت على نفسك وكرامتك واخترت تفضل ..
خليك فاكر إن إنت اللى اخترت متلومش إلا نفسك..
شويه وهترجع تانى وتقول لنفسك لأ مش قادر خلاص همشى
لأ لأ لسه فيا حيل استنى خلىنى شوية كمان .. مش هقدر أمشى دلوقت يمكن
يتعدل..

مرة في الثانية خلاص مفيش فايدة ..
مشيت... ؟ .. قدرت... ؟
بعد كده لو لقيت بدل المبرر عشرة للخذلان والمرجيحة اللى كان قلبك فيها
والله عمرك ما هترجع...
دائماً بقول وإنت جوا الموضوع منتش شايف عشرات المواقف المهينة اللى
اتغاضيت فيها عن جزء من كرامتك..
لكن اما بتخرج برا الموضوع وتشوفه من برا..
تقول لنفسك ازاي انا عملت كدا وكان فين عقلي...
اخرجوا برا نفسكم وفكروا كشخص بينصحك..
وخايف فعلاً عليك

في بعض الاوقات..
نحن بحاجة إلى الصمت.. والصمت فقط..
والكثير من العزلة..
نحن بحاجة لأن نبتعد حتى لا يقترب منا أى شخص..
هذا ما نحتاجه لفترة من الوقت قد تطول أو تقصر ..
هي تلك الفرصة التي نحتاجها لترميم شروخنا الداخلية..
لمواجهة أنفسنا بحقائق تجاهلناها كثيراً ...
للجلوس وحدنا مع قلوبنا لنعرف ماذا تريد...
في محاولة للتواصل معها وتضميد جراحها ..
في خلوة لأرواحنا بعيداً عن صخب الحياة وضجيجها ..
للإنفراد بعقولنا لنعيد توازن أفكارنا ..
وترتيب أولوياتنا ..
وتمزيق بعض الذكريات الغير مهمة التي تمتلئ بها ذاكرتنا ..
نحن بحاجة فقط لنجلس مع أنفسنا لنتصلح معها ...
حتى ولو إختلفنا ...
يكفيننا أننا نتصلحنا ...

الحب الحقيقي هو ما يُرضى قلبك وعقلك دون أن يستثنى أحدهما..
الحب الحقيقي ليس أعمى كما يقولون
ولكنه ناضج حكيم يعرف طريقه جيداً
لتلك القلوب النقية التي تدرك قيمته
لترحب بذلك الزائر العزيز
الذي قد لا تقابله سوى مرة واحدة في العمر..
من رواية سى اوزير (الفرعون المنبوذ)

دائمًا بنقابل في حياتنا الى بيستنفزوا مشاعرنا ويستحلوا وجعنا وجرحنا

ووجع قلوبنا ...

وبيتمادوا في أخطائهم معنا من غير ما يراوا مشاعرنا ..

ومع ذلك يبقوا متصورين إننا هنفضل نسامح ونغفر ...

وإن رد فعلنا شئ مفروغ منه ...

يبقوا متخيلين إنهم حافظينا وحافظين رد فعلنا

وإننا مهما عملوا فينا عمرنا ما هنخرج عن دايرتهم الملعونة ...

حتى لو فكروا في يوم يعتذروا ..

إعتذاراتهم بتبقى متأخرة ..

باردة ...

ملهاش أى معنى ...

وكأنهم بيقولوا لنا أنتوا لازم تستحملونا وتستحملوا جرحنا ليكم ..

لإنكم ببساطة بتحبونا ومتقدروش تستغنوا عنا ..

بس في الحقيقة فيه غلطات بتفوق قدرتنا على الغفران والنسيان

والسامح ..

والألم منهم ومن أفعالهم بيفضل يزيد ويزيد لحد ما بيفوق قدرتنا

على الإحتمال ..

وبيتحول الغضب جوانا لغضب مكتوم ..

مستنى ينفجر في أى لحظة ...

من الحكم الصينيه ان واحد راح الحكيم كونفوشيوس وقاله انه دايما

بيغلط في اقرب الناس ليه وبيعتذر لهم ولكنه بيحس ان معاملتهم

بتتغير ..

فالحكيم قاله هات لوح خشب ودق مسمار كل اما تجرح حد او تنكد

عليه مثلا وتعال كمان يومين ..

وحصل والراجل راح ورجع بعد اسبوع بلوح خشب مليون مسامير ..

كونفشيوس قاله دلوقت أرجع بيتك وشيل مسمار مكان كل واحد
بتعتذر له..

وفعلا تم ورجع الراجل بعد اسبوع بلوح الخشب بس مليون ثقوب
وجروح.. وسأل الحكيم عن السبب فى اللى عمله..
كونفشيوس قاله لوح الخشب دا بالظبط زى النفس البشرية لو قدرت
تجرح أو تخون أو تزعل أو تألم حد بيبقى زى ما تكون دقيت مسمار
ف روحه....

وأما بتعتذر بنشيل المسمار لكن بيفضل مكان الجرح مفتوح..
الوجع لما بيزيد وبيتراكم بيحصل حاجة من إثنين ..
إما وجودهم بيقل بالتدريج جوا قلوبنا لحد ما يختفوا...
أو إننا نبتهم من حياتنا وقلوبنا .. فجأة وبدون مقدمات ..
وساعتها الإعتذار ما بيبقاش ليه لازمة لإن الجرح بيبقى خلاص ترك
ندوبه جوا الروح والقلب ..
ندوب مستحيل نقدر نداويها أو نخفيها أكثر من كده ..
حتى لما بنخرجهم من حياتنا ..
بتفضل الندوب ديه معلمة جوه الروح والقلب ..
وبتفضل النفس مكسورة ..
عاملة زى الطفل الصغير اللى إتجرح من شئ ويفضل حياته خايف
يقرب له شان ما يتوجعش تانى ..
خايفة تقرب أو تأمن لحد تانى عشان ما يوجعهاش تانى ..
إرحموا القلوب وإحذروا تقلبها ..
إحذروا إنكم تيجوا عليها وتوجعوها ..
لإنكم وقتها بالتأكد هتخسروها ..
للأبد

لو في يوم لاقيت الشخص اللى يخاف على زعلك وبيحاول يراضيك بأى
طريقة لو زعلت ..
الشخص اللى يهمله أمرك فعلاً ..
الشخص اللى عايز يعمل أى حاجة ترضيك ..
الشخص اللى بيدافع عنك ويحميك ويخاف عليك يمكن أكثر من نفسه ..
الشخص اللى بيشفوف في نجاحك نجاح ليه ...
اللى نفسه يشوفك أحسن حد في الدنيا ...
الشخص اللى بيشفوف في إنكسارك وحنك هزيمة ووجع ليه
الشخص اللى تجرحه دموعك ...
ويفهمك من نظرة عيونك ...
اللى يفرق معاه غيابك وكن روحه هى اللى بتغيب عنه ..
الشخص اللى على إستعداد إنه يشيل على كتافه هموم العالم بس ما
تشيلش إنت الهم لحظة ..
الشخص اللى بيحاول يمتص غضبك ويستوعبك ويحتويك وقتها ...
الشخص اللى لو جرحته بدون قصد بيسكت لغاية ما تهدى وتفهم
لوحدك إنك جرحته ..
الشخص اللى بيحبك زى ما إنت ..
بعيوبك ومميزاتك ... بحلولك ومرك ..
اللى بيحبك في غضبك ورضاك ..
الشخص اللى بيحس إنه بيموت لو في يوم زعلت منه ...
لو لاقيت الشخص ده في يوم إمسك فيه أوى ..
إوعى في يوم تفلت إيدته ..
لإنك عمرك ما هتقدر تعوضه أو تلاقى زيه تانى لو في يوم راح منك ..

القوة ..هى إنك تبقى مسئول عن كل الى حواليك .. من غير ما تضعف
ولا تمل ..

إنك تبقى ليهم السند والظهر الى بيتسندوا عليه ..
إنك تقدم السعادة لكل الى حواليك حتى لو إنت عاجز إنك تكون
سعيد..

إنك تتجاوز الأزمات والمشاكل وتتأقلم مع الظروف المتاحة عشان تقدر
تغيرها ..

إنك تسقط من حياتك كل الناس الى بتستنفذ طاقتك من غير ما تفكر
فيك للحظة ..

إنك تواجه الأمور من غير ما تفكر فى الهروب ولا الإستسهال..

القوة إنك تتغلب على أنانيتك وتفكر فى غيرك ..

القوة إنك تبقى شايف طريقك قبل ما تخطى فيه وتبقى عارف إنت
عايز إيه بالضبط ..

القوة هى إصرارك على تحقيق كل شئ حلمت بيه فى يوم ..

وحتى لو ما قدرتش تحققه ..

مش هتقف ولا تعجز ..

بالعكس هتدور على حلم غيره عشان تحققه .. لإن الدنيا ما بقفش لى حلم
ما إتحققش ..

ولإن أحلامنا ورغباتنا بتتغير كل يوم عن الى قبله ..

القوة إنك تثبت على مبادئك من غير ما تتبدل ولا تتغير ..

إنك ترفض التنازل أو تبيع قضيتك زى غيرك من الى ضعفوا ..

هى إنك تبتسم وكل ما فىك بيئن من الألم ..

هى أنك تحتفظ بهدوئك وجواك ضجيج مدينة ...

هى إنك تعفو عن الاخرين مع أنهم ما يستحقوش العفو .

هى إنك تحتفظ بصمتك وتصبر وترضى وأنت نفسك تصرخ بصوت على ..

هى دي القوة

لما يكون حب حد ليك حقيقى هتشوف اهتمامه
هتحمس بشوقه وهتشوفه فى عينيه قبل أفعاله ..
هتشوف مكانتك فى قلبه وهتحمسها فى كل حاجة بيعملها ..
هيوفر الوقت ليك مخصوص .. من غير أعذار ولا غياب ...
هتحمس بحبه وبمشاعره فى أنفاسه حواليك ..
هتشوف حقيقتك فى عينيه بدون رتوش ..
هيحس بيك لما تضحك وإنك جواك مهموم ..
لأنه هو الوحيد اللى هيبقى شايفك من جواك ..
كل الناس هتشوف ملامحك بس إلا هو ..
هيحس بدموعك اللى ما نزلتش من عيونك ولا حد شافها ولا حس
بيها غيرك ..
هيحس بوجعك وإحتياجك من غير ما تتكلم ولا تشكى ..
هيكون جنبك وقت ما تحتاجه ..
حتى لو مشغول برده هيكون موجود ومش هيسيبك ولا يتخلى عنك
..
لو فى يوم لاقيت الحب الحقيقى ده ..
إمسك بتلابيبه زى ما بتتمسك بأستار الكعبة ...

فيه ناس كده لما بتخرج من حياتك .. بتسترد عافيتك بعد خروجهم
مباشرة ...

روحك بتنور ... ملامحك بتنور ..

بتحسّ إن روحك ردّت فيك ... وكإنك كنت عايش معاهم جثة هامدة
من غير روح ..

بتحسّ إن قلبك رج ينبض تانى في حرية وكإنهم كانوا حابسينه وموقفين
نبضه ..

بتحسّ إنك بتسمع موسيقى روحك اللى أصابها الصمم في وجودهم...

ثقتك في نفسك بترجع لك وكأن وجودهم في حياتك إغتالها ...

بترجع لك ثقتك في إحساسك وعقلك وفكرك وفي قراراتك كمان ...

بتحسّ إنك بقيت مكتفى بنفسك وسعيد بيها ..

وكإن وجودهم كان عامل غشاوة على عينيك ..

غشاوة خليتها مش قادرة تشوف الجمال لا في نفسك ولا في اللى حواليك...

هتسترد طاقتك اللى إستنفذوها ..

وهتسترجع رصيد أحلامك اللى بددوه بوجودهم وأنانيتهم ..

هتتحس بنور الأمل والتفاؤل بينور حياتك تانى ...

وكإنك بتفتح شبابيك حياتك على شروق جديد ..

هتتحسّ إنك لأول مرة بتشوف الأمور على حقيقتها ...

بتحسّ إنك قادر تحكم على الأمور لأول مرة ...

وإنت برة الدائرة السودا اللى فضلوا حابسينك فيها ...

بتحسّ أد إيه إنت ظلمت نفسك لما سمحت لهم إنهم يدخلوا حياتك

ويعششوا فيها زى الخفافيش ...

عشان كده لازم تكون سعيد إن ربنا نجاك منهم وخرجوا من حياتك ...

للأبد ...

مش عيب إنك تعتمد على نفسك ...
جميل إنك تتحمل أعباءك لوحدك..
جميل إنك تواجه مشاكلك وظروفك لوحدك ...
وإنك تبقى عارف إن الناس ممكن تتخلى عنك في أشد لحظات
إحتياجك ..

ده مش شئ سئ ... بالعكس ده في صالحك...
هتتعلم مع الوقت إن مشاكلك وإبتلاءاتك كانت منحة مش محنة...
صحيح كونك بتواجه الدنيا لوحد ممكن يكون صعب ..
بس هتتعلم تحاربها وحدك من غير ما تحتاج لحد ..
من غير ما تدى الفرصة لحد إنه يخذلك أو يتخلى عنك وقت
إحتياجك ..

هتتعود إن نفسك يكون طويل عشان تقدر تكمل للآخر ..
هتتعود على مفاجآت الحياة ..
هتتعود إنك تتعامل مع الألم والصدمات وتتغلب عليها ..
كل اللي هتحتاجه هو الصبر والثبات ..
إنك تكون فاهم إن بعد ده كله أكيد هتوصل في يوم للى إنت بتعلم
بيه ..

المهم إوى تخلى الحياة تهزمك ..
خليك دايماً أقوى منها ..

عارفين إيه هو الحب المستحيل ..؟
لما تعشق حد أوى وإنك متأكد إنه مش ليك ولا حتى عمره هيبقى
ليك ..

بس غصب عنك قلبك بيفضل ينبض بحبه ..
الحب المستحيل حب من غير أمل .. عشان كده هو حب صعب..
بس فى نفس الوقت هو أسمى أنواع الحب ..
زى ما قال فريد الأطرش فى أغنيته ...
(أسمى معانى الغرام .. الحب من غير أمل) ...
عارفين ليه ..؟

لإنه بيبقى حب مجرد من أى مصلحة أو هدف ...
فى الحب المستحيل بتبقى عارف النهاية وشايفها بس غصب عنك
قلبك ما بيقاش ملكك ..
بتحاول تسيطر عليه وتبعد وتقسى ..
بس ما بتقدرش لإن قلبك بيغلبك فى النهاية ويفرض إرادته عليك..
مش هتقدر غير إنك تحب وتسامح وتشوف حبيبك دوا قلبك لحد
آخر يوم فى عمرك ..
يمكن بعضنا يشوفه مرض صعب الشفا منه ..
لكن ما نقدرش ننكر إنه حب من نوع راقى ..
حب صادق ومشاعر إنسانية مجردة من غير بواعث مادية ..
حب عايش على الأمل والإنتظار فى قلوب أصحابه ..
حتى لو كل الناس شايفاه مستحيل ..

كسر الخاطر من أصعب الأحاسيس اللى ممكن يعيشها بنى آدم ..
كسرة الخاطر بتخلى الدنيا صغيرة أوى فى عين الواحد ..
بيخليكه يكره الدنيا والناس وظروفه ..
كسرة الخاطر بتخلق جواه كتلة غضب ملهاش حدود ..
من غير ما يعرف حتى هو غضبان من مين وليه ..
كسرة الخاطر بتخلق جواه حد ما يعرفوش ..
حد ناقم على كل شئ وأى حد ..
كسرة الخاطر بتحول الطيبة لجبروت ..
بيفضل شايف إنه طبيته كانت غباء ..
وإنه لازم يتغير ..
عشان بس ما يعيش نفس الإحساس ده تانى ..
كسرة الخاطر بتكسر أى حاجة حلوة جوة أى حد ..
لحظة بتخلى الإنسان يكره طبيته ومبادئه وأخلاقه ..
كسرة الخاطر هى كسرة للنفس وللقلب وللروح ..
كسرة الخاطر بتصنع شرخ كبير جوة الروح صعب أوى إنه يتصلح ..
عشان كده إبعدوا عن الناس اللى مش قادرة تقدر كم ولا تعرف
قيمتكم ..
الناس اللى إديتوها أكبر من حجمها وسمحوا لها تكسر بخاطركم..
الناس اللى إستغلت طبيبتكم عشان تحقق أهدافها من غير ما تراعى
مشاعركم ..
وإوعوا فى يوم تكسروا بخاطر حد ..
لإن حقه هيخلص منكم فى يوم .. وزى ما كسرت بخاطره هتلاقى اللى
يكسر قلبك ..

لما نيجى ناخذ قرارنا بالإرتباط بحد ..
لازم نختار اللى هنرتبط بيه ونقضى معاه اللى فاضل من عمرنا ..
لازم نختار اللى روحنا تروح له وقلبنا يشاور عليه ويقول هو ده ..
نختار اللى بيحس بينا من نظرة عيوننا .. من نبرة صوتنا .. اللى يفهمنا
قبل ما نتكلم ..
اللى هيستحمل معانا تعب الحياة ويهون علينا مرارتها ..
اللى هيتقبلنا حتى في أسوأ حالاتنا .. هيقبلنا لما نمرض .. لما نكون صاحيين
من النوم .. لما نغضب .. لما نحزن ..
اللى يسهر طول الليل يراعيك في تعبك وعينه ما تغمضش طول ما إنت
تعبان .. وكأنه هو اللى تعبان مش إنت ...
اللى يتفهمنا ويتفهم نفسيتنا .. يحميننا من نفسنا و خوفنا و تعبنا...
اللى تحس معاه إنك مش محتاج تشرح أو تبرر حاجة إنه فاهمك وحافظك
أكثر من نفسك ..
اللى يحبك ويقوى جناحاتك وهو متأكد إنك عمرك ما هتطير ولا تحس
بالحياة والحرية من غيره ..
اللى يسندك وقت ضعفك ويدفعك على سلم طموحك ..
اللى دايمًا يكون شايف نجاحك نجاح ليه وفشلك هو فشله ..
اللى يكون فخور بيك وسط الدنيا مهما كنت إنت إيه ..
اللى يفرح لفرحك ..
وقلبه يدوب لو في يوم شافك حزين أو زعلان ..
اللى يكون ليك الحزن والدفا لما تشتد عليك برودة الأيام ..
اللى حبه ليك بيان في عينيه قبل ما يعبر عنه لسانه ..
اللى ياخذك معاه في دعائه وياخذ بإيدك لطاعة ربنا لأنه عايزك معاه حتى
لما تفارقوا الدنيا ..
لما نرتبط لازم نختار صح بعيد ن المظاهر الكدابة والكلمات المتزوقة اللى
بتخدع.. لأنه إختيار العمر كله

في مشهد في فيلم الشموع السوداء ...
نجاته كانت عمالة تزن على «صالح سليم» زى أى ست مصرية أصيلة
عشان يحكيلها موجوع من إيه..؟ ،
مالك..؟ ، احكي..؟ ، لا مالك..؟ ، لا فيك إيه...؟
فآخر ما زهق منها زعق فيها بعصبية وقالها
«مبيتحكيش ، مبيتحكيش».
أحياناً بيبقى الوجع أكبر من إنه يتحكى ..
مش لازم نبقى هنرتاح لما نحكى اللى واجعنا ..
أحياناً الألم بيبقى أكبر لما بتتكلم عنه وتخرجه وتعرى وجعك ..
وإنيك بتعيش الحاجات اللى وجعك مرة تانية لما تحكى عنها ..
بتعيش الوجع تانى .. والقهر تانى .. والألم تانى ..
عشان كده لما تلاقوا حد موجوع أوى كده ورافض الكلام ..
ما تحاولوش تزنوا عليه عشان تجبروه يحكى ..
سيبوه براحتة .. هو لو عايز يحكى ويخفف حمل قلبه هيحكى لوحده

..

لو كان يتحكى وهو مرتاح لكم .. أكيد هيحكى لوحده ..
ما تحاولوش تدوسوا أوى على الجرح ..
إنكم ممكن تفتحوه تانى من غير ما تقصدوا ...
حاولوا تتفهوه وتحتووه وتحسسوه بالأمان وبس ..
أحياناً هو ده كل اللى بنحتاجه لما نكون موجوعين ..
إننا نلقى الأمان والدفا والإحتواء .. إننا نبكى أو نصرخ ونخرج اللى
جوانا وبس ..
من غير ما حد يسألنا مالنا

محدث بيعرف غلاوتك إلا لما بيخسرك..
ويبدأ يفهم شوية بشوية إنك بتبعد عنه..
وإنك اتبدلت ومبقاش فارق معاك قربه من بعده عنك..
بيبدأ وقتها يسأل نفسه عن خطأه في حقك ..
بيبتدى يراجع نفسه تانى ..
بس بعد فوات الأوان ..
لأنك وقتها بتكون قفلت من ناحيته .. ومبقاش ليه في قلبك مكان..
فيه مثل مصرى بيقول كتر الحزن بيولد البكا....
أو في المثل الشامى اللى بيقولك كتر الدق بفك اللحم..
وإنت كتر القسوة هتخلى قلبك يجمد ..
هيخليك تشوفه حد عادى وإنك تخرجه من قلبك وعقلك ..
هيخليك ترجعه عشان يبقى حد عادى
ويمكن برده ترجعه عشان يكون حد مالوش مكان خالص في حياتك ..
القسوة هتخليك تفتح عنيك وتشوف عيوبه وأنايته اللى مكنتش
شايها ..
القسوة هتخلى قلبك يجمد وهتعرف تبعد من غير ما تحزن في يوم
عليه ..
لإن اللي بيحبك عمره ما هيفكر يسيبك ولا يأذيك في يوم ..
عشان كده إبعد عن الناس ديه وسيهم يعرفوا قيمتك بجد ..
بس بعد فوات الأوان ...

دائمًا بشوف البنت كائن ظلمته الأفكار والعادات والتقاليد الخاطئة..
الأفكار اللى بتنافى جوهر ديننا اللى كرم المرأة ورفع شأنها ومكانتها..
عشان كده بقول لكل بنت ..
اعملى اللى انتى مقتنعه بيه انتى ليكى شخصيتك ... أنتى ليكى كيانك و
وجوودك ..
انتى مش مخلوقة درجة تانية .. انتى ربنا كرمك ...
بعض الناس بتستغل المبادئ دى ضدك وهما مش فاهمين معناها...
انتى محجبة .. منقبة .. محترمة أو لا ..
كل ده ليكى ..
إنتى نفسك هتدخلى قبرك لوحدهك ..
هتتحاسبى لوحدهك ..
نجاحك أو فشلك ليكى لوحدهك ... متجريش ورا إنك تعجبنى الناس ..
لانك عمرك ما هتعجبنى ، ومهما عملتى هيطلعوك العيب ...
ملكيش دعوة بالناس ديه ،
ده «مجتمع معاق معيق يعيق» ...
بتحبي شغلك ..؟ ... اشتغلى ، بتحبي تخرجى ..؟.. إخرجى ..
سيبو البنت فى حالها شوية ..الغلط غلط على بنت أو ولد ..
بس التفكير عند بعض الناس معوج ومحتاج يتظبط ..
متبقيش ضعيفه عشان احنا فى مجتمع بيحى على الضعيف ومش
يرحمه ..
خليكى دائمًا قوية ..
مش بس عشانك .. ولا هشان اللى حوالىكى .. لكن لإنك نص المجتمع
وأساس نصه التانى ..
لو ضعفتى أو ضعيتى هيضع معاكى

انك لاحتاج الى اكثر من روح
تصمت بقربها ..
فتفهم صمتك دون كلمات
تشعر بك مهما بعدت المسافات
تستمع لنبضك وسط الضجيج
تروي روحك فتشعر بالحياة بعد أن أنهكك جفاف الأيام
تخاطب عينيك التي تاهت في زيف النظرات
فتجتاز العمر
بلا خدوش على القلب ..

اكثر حاجة ممكن توجعك هى الناس القريبة منك اللى بتتغير فجأة ..
واللى مبتكونش ثابتة لا على مبدأ ولا على أسلوب واحد..
لكن بقى اللى يربحك اكثر واكثر لما تلاقى نفسك مندفع بالحب
تجاههم ..
من غير ما تحاول تمنع نفسك أو تاخذ حذرک ..
مش بتحاول تشوف شئ غير الغلاف اللى من بره واللى شدک ..
وبترفض تسمع
أو تعرف عنهم أى شئ حتى لو كان حقيقة ..
زى ما تكون خايف تعرف حقيقتهم ..
أخطر شئ ممكن يدمرک إنک تتسند بكل قوتک على قلب منزوع
منه الرحمة...
قلب أسهل حاجة عنده إنه يبيع ويفارق ويمشى من غير ما يبص
وراه ..
أسوأ حاجة تعملها إنک تترمی بكل ثقلک على کتف هشّ ..
وتنسى إن البنی آدم ثقيل ...
ثقیل على القلب والروح لو مش غالى بالشکل اللى يستاهله ..
احمي شویة الثبات الیّ جواک ..
لا روحک و لا عُمرک حِمْل جراح وخذلان أكثر من کده ...
ودور على الناس اللى ممكن تسندک بجد ..
إختار السند والأمان فى حیاتک ..
وتوکل على الله فى کل أحوالک وإلجأ لیه ..
هو نعم السند ونعم النصیر..
وهو الأمان للخائفین ...

مش دائماً تقديم التنازلات بيبقى غلط ..
لكن الغلط إنها تكون للناس الغلط اللى متستاهاهاش ..
غلط لما تتكرر مرة واثنين وثلاثة..
التنازلات مع الناس الغلط بتطمعها فيك..
ويوم واثنين تلاقى التنازلات دى بقت واجب وبقيت مجبر انك تقوم
بيها..
والأسوأ إنك هتتلام لو مقمتمش بيها وتبقي انت المقصر..
التنازل للناس الغلط اللى عمرهم ما هيقدرُوا تنازلاتك ديه هيخليهم
يجرحوك ..
حافظ على قلبك الطيب ..
لكن ما تنساش الحذر ..
حافظ علي مشاعرك واحاسيسك ومتفرطش فيها لحد ..
وحتى لو اللى قصادك يستحق دا..
براحة على قلبك..
لان هيجى وقت مخزونك يخلص... ومالوش تجديد..
اعمل دائماً توازن ما بين العطاء والمنح والأخذ ..
ما متبالغش في حبك..لكن برضه اوعى في يوم تقسى على حد..
اتعلم متقربش لحد الالتصاق... ومتبعدش لحد الاغتراب...
والناس اللى خايف تخسرهما .. اخسرهما عشان تبطل تخاف ...
اخسرهم ما داموا ما قدروش تنازلاتك عشانهم ...
اخسرهم وهما هيرجعوا ..
بس بعد ما تكون إنت إتغيرت وما بقتش قادر تديهم حاجة ولا
تقدم لهم أى تنازلات ..
بعد ما تكون خرجتهم من حياتك .. للأبد

كتب فرانز كافكا الى «ميليئا» يقول :
تتوهمين ، فلن تستطيعي البقاء إلى جانبي مدة يومين ..
أنا رخو، أزحف على الأرض.
أنا، صامتٌ طول الوقت، انطوائيٌّ، كئيبٌ،
متدمرٌ، أنانيٌّ وسوداويٌّ.
هل ستتحمليين حياة الرهينة، كما أحيائها ؟
أقضي معظمَ الوقتِ محتجزاً في غرفتي أو أطوي الأرزقة وحدي.
هل ستصبرين على أن تعيشي معي بعيدة كلياً عن والديك وأصدقائكِ
بل
وعن كل علاقة أخرى،
ما دام لا يمكنني مطلقاً تصور الحياة الجماعية بطريقةٍ مغايرة
لا أريدُ تعاستكِ يا «ميليئا» ..
أخرجي من هذه الحلقةِ الملعونةِ التي سجنتكِ فيها..
عندما أعمايني الحب !
فردت عليه «ميليئا» :
« و إن كنتَ مُجرّد جثّة في العالم .. فأنا أحبُّك »

من اجمل وأعمق مشاهد السينما المصرية ، كانت في الحوار ما بين
فاتن حمامه و صالح سليم في رائعته الباب المفتوح ...

- انا كنت فاكرة إنك سافرت

- ما قدرتش أسافر من غير ما أشوفك.. لسه مخصماني؟!.. ما هو لازم
حاجة من اتنين ، يا مخصماني يا خايفة مني !

- وهخاف من إيه ؟

- سؤال وجيه .. الواحد بيخاف من شخص تاني ليه؟! ، إما إن الشخص
ده مؤذي أو .. خايف يحبه !

- أنا عمري ما هاحب حد !

- متأكدة؟!!

- طبعا متأكدة !

- أنا شخصيا مش متأكد !

- قصدك إيه ؟

- قصدي إن إنتِ حتحبيني ..هتحبيني أنا .. هتصحي في يوم من الصباح
وتكتشفي إنك بتحبيني .. بتضحكي على إيه؟!!

- ياريت يكون عندي ثقة في نفسي زيك كده يا حسين !

- مش فاهم حاجة !

- إيه اللي بيخليك متأكد بالشكل ده زي ما أكون أنا شخصياً قتلتك
إني .. إني بحبك !

- الحاجات دي الواحد ما يقولهناش بلسانه قد ما يقولهنا بعينه

- وعيننا قالتلك إيه بقى ؟

- كفاية إنها ما بتلمعش إلا ليا أنا بس .. كفاية إن وشك ما بتنوروش
الابتسامة إلا ليا أنا بس

- انت بتتخيل حاجات وهمية .. حاجات ما حصلتش أبداً !

- خديني على قد عقلي ..

- أنا آسفة يا حسين

- لا أرجوكي أنا عايز أشوف وشك منور النهاردة زي ما شفته أول مرة ..
عايزة صحيح تسعديني قبل ما أسافر ؟ .. طب خرينا نحلّم مع بعض
.. نفرض مثلاً إنك صحتي يوم الصبح واكتشفتي إنك بتحبيني !

- وبعدين !؟

- وبعدين حتروحي على مكتب التلغراف وتبعتيلي تلغراف على عنواني
في ألمانيا

- أقول فيه إيه ؟

- قم بالترتيبات اللازمة لعقد زواجنا .. سأخبرك في البرقية التالية بموعد
الوصول

- وبعدين ؟

- تركبي المركب وتيجي

- كل السكة دي لوحدي !!!

- دي السكة اللي ضروري تمشيها لوحدك !

- طب افرض إن البحر كان هايج والموج عالي !؟

- عشان نوصل للبر ضروري نواجه الموج والبحر

- وعالبر ألاقي إيه ؟.. قهوة مدلوقة ؟!.. ما تضعش وقتك ..أنا مفيش

فايدة مني !

- ليلي ..عارفة حتلاقي عالبر إيه ؟! حتلاقي حاجة أهم مني ..أهم من

أي إنسان تاني .. حتلاقي نفسك .. ليلي الحقيقية

احنا ليه لما بنتصدم في اشخاص معينه ايا كان طبيعه علاقه بينك
وبينهم بنزعل..

مع ان دي حاجه طبيعيه في البشر ...

ليه متعتبرهاش تجربه وبتتعلم منها الصح ايه في علاقتك مع الناس ...

مهو طبيعي انك تتعامل مع جميع انماط البشر ..

والطبيعي انك تتعلم.

يعني من الاخر ازعل .. اتضايق ... اندم ... بس اتعلم..

لانك لو غلطت كل مرة نفس الغلطة هتفضل طول عمرك تخسر...

لحد ما هتلاقي نفسك عايش لوحدهك ..

وبلاش والنبي حكاية اصل هموت .. اصلي تعبانه .. اصلي اتصدمت..

اتحرر من كل قيد مربوط فيه من رقبتهك للارض..

اتحرر من العلاقات الخطر في حياتك..

اتحرر من العلاقات اللي بتاذيك نفسيا وتستهلك روحك..

اتعود تعيش لنفسك .. وصدقني مش عيب لما تحب نفسك ...

علي الاقل لما تحب نفسك هتعرف بجد تحب اللي حواليك..

متقبلش انك تعيش دايمًا دور الضحية

متقبلش حد يتحكم في مشاعرك ويكون بالنسبالك كلمه تفرحك وكلمه

تزعلك ..

متقبلش ان احلامك وحياتك وعمرك يبقى متعلق بشخص واحد وبس..

اتعود علي كدا واتأكد ان الحياه مستمره سواء اللي معاك دلوقتي

كملوا في حياتك او لا..

يعني كدا كدا هتعيش مواجهاات في حياتك هتكون لوحدهك فيها.

يبقى ببساطه كدا اتحرر من اي قيد بتربط نفسك بيه..

حينما تفارق جزء من روحك وتضطر للتخلي عما يشق عليك التخلي
عنه ..

يكون أحيانا كل ما تستطيعه أن تومئ برأسك..
وتمضي بخطوات متثاقلة في طريق لا تبين ملامحه من عيون أغشتها
دموع قد تجمدت في محاجرها..

فلم تعد تري سوى ظلال لذكريات لا زالت تنبض بالحياة ..
وقلبك منهك يعتصره الألم وكأنه هارب من عاصفة قد إقتطعت جزء
منه وقد توقف نبضه ليهمس لك :

- الان فقط يا صديقي .. لم يعد لدينا ما نخشي عليه ..

من رواية (عفار)

من أجمل الكلام اللى إتقال فى فيلم (الشموع السوداء)
الجملة اللى اتقالت فى الحوار اللى دار ما بين صالح سليم ونجاه:
- هو فى حد مبيقاش عارف اذا كان عايز حاجه او مش عايزها !!
- طبعا .. ده فى ناس بتعيش حياتها كلها من غير ما تعرف هى عايزه
إيه بالظبط ..
ولو كان كل واحد فى الدنيا عارف إيه اللى عاوزه وإيه اللى مش
عايزه..
مكنش يبقي فى حاجه اسمها الندم !!

كان فيه عالم من علماء المسلمين اسمه الامام احمد بن حنبل راجل مشهور جداً و سيظه مسمع في جميع بلاد المسلمين بيحضر له في القعهه اكثر من ٥٠٠٠ واحد تبص في وشه ترتاح نفسياً علي الاقل شهر ...!

وفي ليله الامام احمد اشتاق انه يزور المدينه المنوره ويصلي في مسجد رسول الله صلي الله عليه وسلم ...
سافر لوحده وصل المدينه دخل المسجد النبوي بعد مشوار ابن لذيينا متعب ...

صلي في المسجد العشاء وقعد جنب قبر النبي وسند دماغه ..
فمن عادة عمال النظافه في المسجد النبوي انهم يمشوا الناس بعد العشاء علشان ينضفوا المسجد ..
فقربوا من الامام احمد وصحوه من النوم وقالوله قوم يا اخينا امشي هما عارفين اسم الامام احمد وشهرته لكن ميعرفوش شكلاً..
فقالهم (انا رجل غريب ليس لي احد في مدينه رسول الله ف إسمحوا لي ان انتظر حتي اصلي الفجر ثم امشي من هنا)...
رفضوا طبعاً ومن هنا لهنا قاموا مجرجرين الامام احمد من رجله وطروده بره المسجد !!

ياخبر ابيض

دا لو عرفوا انه هو كانوا هيبوسوا رجله !!
المهم شافه راجل علي قد حاله شغال خباز صعب عليه فقاله تعالي اقعد عندي لحد الفجر
و بعد كدا توكل علي الله امشي...
وافق الامام احمد وراح معاه بيته فلاحظ حاجه غريبه قوي علي الراجل الخباز ...

طول الليل عمال يعجن الرغيف ويحطه في الفرن ويقول

(استغفر الله)

وبعد لما يطلع الرغيف من الفرن يقول

(استغفر الله)..

طول الليل علي الحاله دي يحط الرغيف يقول استغفر الله يطلعه

يقول استغفر الله ...

الامام احمد قال ايه حكاية الراجل دا؟!!

معقول ميعرفش غير كلمة (استغفر الله) !!

فسأله وقاله : ايه أثر الاستغفار عليك؟!!

انت عمال تقول استغفر الله كل شويه حصلك خير ايه من ورا الذكر

دا؟!!

رد الراجل الخباز وقاله : عمري ما تمنيت اي امنيه غير لما ربنا

يحققهالي الا امنيه واحده بس !

اني اشوف الامام احمد بن حنبل !!

قاله يا اخي من اجل ان يحقق الله لك امنيتك جئت اليك جرجره !

ربنا خلاهم يجرجروني من المسجد علشان يحققلك امنيتك و تشوفني!

المهم

ربنا هيجرجرك امنيتك من زمارة رقبتها لحد عندك صدقني ..

متفتكرش انه ناسيك ...

بالعكس هيجيبهالك علي اكمل وجه ...

فقط قول بيقين

استغفر الله ...

وتأكد تماما انك لما تحس انك قربت تياس من الدعاء والاستغفار لان

مفيش حاجه اتحققت

ان وقتها ربنا بيكون قرب قرب يستجيب ليك ويحقق الي بتتمناه ...

بس الشيطان بيخدعك وعاوزك تبطل دعاء ...

ربنا بيحب العبد الزنان زن ولح عليه زي العيل الغلس الي يشبط
في الحاجه
ويتشعلق فيها بإيديه وسنائه ...
واعرف إنه من لزم الاستغفار جعل الله له من كل هم فرجا ومن كل
ضيقي مخرجا ورزقه من حيث لا يحتسب....

أحياناً بتحس إن احساسك انعدم بالنسبة للكلام في الشات..
وإنه مابقتش تحس بالكلام ولا بتستطعمه..
لما بيحصل سوء فهم بينك وبين حد بتحبه بتقي محتار ...
عايز تقوله «فكك من الخلاف والزعيق ده انا بحبك»..
وفي نفس الوقت خايف ليفتكرك بتفه الموضوع وبتاخذه علي قد عقله. ...
لما بتبقي عايز تعبر عن حبك تجاه شخص بتحس الكلام من كتر ما
إتكتب

مبقاش ليه طعم

« بحبك، وحشتني، يابنى والله انت غالي عندي، والله ليك واحشة»..
كل الكلام ده متكرر ومن كتر تكرار الكتابة مبقاش محسوس. ..
لما بتكون بتشرح حاجة لحد في البداية بتكون متحمس جداً..
وتكتب وتقف في النص ويسيطر شعور
«ياعم فكك ممكن ميكونش هو متحمس ولا بيقرأ ولا مهتم»..
فبتفقد الحماس وماشى تمام نكمل لما نتقابل..
وبيتنسي الموضوع ويضيع حماسه....
لما شخص يحكيك عن مشكلة بيعاني منها..
حرفياً مش بيبقي قدامك غير تقوله «معلش»..
كلمة باهتة منعدمة الاحساس..
لكن مافيش بايدك غيرها..
ممكن تكون إتأثرت بمشكلته وزعلت لكن مش عارف تعبر له..
وهو يا بيتفاهم الموضوع يا بيتضايق اكثر....
الموضوع بيبدأ معاك بالتدرج..
زمان كان عادي..

دلوقت بتبقي عايز في نص الشات تقول للي بكلمه
يلا ننزل دلوقت وفكك من الكتابة وقلة الذوق دي..

لو بتحب حد او عي تهدر مشاعرك في مربع شات رخيص زي ده ..
قابل الشخص واحكيه علي اللي في نفسك ..
لو بتتخاف مع حد بتعبه والنبي اقفل الشات ..
اقفله خالص وتاني يوم انزله اتخانقوا في الشارع ..
اضرخوا بعض ..
لكن هنا ممكن تخسروا مشاعر وصدافتكم شوية بشوية ..
بسبب الخناقات علي حاجات تافهه باستمرار
لو فضلت هنا وحياتك بقت في مربع الشات ..
مع الوقت هتتحول لروبوت ملكش مشاعر ..
روبوت عبارة عن شوية ايموشنات وآلة كاتبة بدون احساس ..
وهتخسر كثير ..
هتخسر مشاعر كل حاجة حلوة ضيعتها هنا ...

انتوا ليه مفكرني مريض ..
كل الموضوع ان الشخص اللي حبيته إختفي في نظركم بس عايش معايا
..
ليه بتنسوا الحب والعشيره واللحظات الحلوة بمجرد ما وجود الشخص
بينتهي؟..
انتوا اللي مرضى مش انا ..
فاهمين
من فيلم.. (آسف علي الازعاج)

ساعات بتقول لحد ليك وحشة ..
عشان مش قادر تقوله وحشتني.
وساعات بتقول لحد فينك مش باين ..
عشان مش قادر تقوله ليه مبتطمنش عليا.
وساعات بتقول لحد .. عيب عليك انت عارف انت عندي ايه ..
عشان مكسوف تقوله بحبك
وساعات بتقول لحد ابقني أسال عليا ..
عشان مش قادر تقوله متغبش عني
وساعات كلام كتير جوانا بس مش قادرين نقوله زي ماهو ..
يمكن لاننا بنكون وقتها صادقين اوي ..
وبنخاف ننجرح..

ليه دايما إحساسنا بيكون صح وكأن في أوقات كتيره بيبقي مكشوف
عننا الحجاب او بنقرا الطالع ..
بنكون عارفين كل حاجه كأننا حاضرين في المواقف واللحظات دي ..
او كأنها مرت علينا قبل كدا ..
دايما صدقوا احساسكم ..
الإحساس اتخلق مش من فراغ اتخلق علشان نصدق ونمشي وراه ..
أوعي تسمح لنفسك تلغي الحاسة دي ابدأ ..
الخلاصة إحساسك دايما صح
احساس المعافرة بيبقي حلو ، لما يكون الشخص الي قدامك يستاهلها
ومقدر ده ،
وقتها بتلاقى نفسك عندك استعداد تعافر اضعاف مُعافرتك ،
غير كدة هتبقي مجرد قلة قيمة واستنزاف لروحك وحياتك ومشاعرك
علي الفاضي.

المفروض إنك تفضل من غير ما أكون مضطره أقولك خليك ..
تكون معايا من غير ما أبذل مجهود حتى لو غلط ..
أنا محتاجه اشوف نفسى مقبولة رغم غلطى ..
محتاجه لو حطيت أسوار بينا تكسرهما معايا ..
محتاجه أشوف إن مفيش حاجه ممكن تخليك تبعد ..
محتاجه أمان مفتقداه معاك من زمان ..
لو لمجرد الغلط هنبعد يبقى فين العلاقه اللى بيننا..
لو كل حاجه سهله كده يبقا فين المميز اللى اخترتني عشانه..
لو مش ماسك فيا يبقى ازاي كان فيه حب ..
انا بضعف و بغلط.. بغلط لاني انسانه لأن دى طبيعتنا البشريه اننا
نغلط ..
بس انا لما اضعف المفروض اخذ قوتي منك ..
و لما اغلط و اشوف نفسى وحشه المفروض انت اللى تقولى اني مش
كده
الحب مش ذل ولا طاقه هنخلصها عشان نحاول نقنع بعض نكون
سوا ..
كان نفسى تكون هنا من غير ما اترجاك .. تكون هنا عشان انت عايز
تكون ..
انا مش عايزه شخص يحاربني .. انا عايزاك تحارب معايا.
(الرائعه نيللي كريم في مسلسل تحت السيطرة)

كل منا لدية نقطة ضعف..
لكن شروخنا وضعفنا معاً هى من تصنع حياتنا بطريقة عجيبة
ومثيرة ..
يجب علينا جميعاً أن نتقبل بعضنا البعض على ما نحن به
وننظر لما هو حسن لدينا..

عندما تكون غارقاً في الحب حتى أذنيك فإنه من المستحيل أن ترى
عيوب نصفك الآخر..
فوقتها تغشى عينيك سحابة سوداء تخيم على حواسك..
وما أن تتنازل أول خطوة في سبيل حبك فلن تشعر بنفسك وإلا قد
بدأت سلسلة من التنازلات التي لن تنتهى
إلا عندما تفيق من غيبوبتك..
حينئذ سوف تنظر إلى الموضوع بنظرة محايدة..
نظره شخص آخر يسدى لك النصيحة..وقتها ستبدأ في مراجعة نفسك
ومواقفك عشرات المرات..
لتندهش كيف لك أن تنازلت خطوة فخطوة..
وستدرك وقتها كم أخطأت بدخولك هذه التجربة مع هذا الشخص
بالذات..

ليس كل شيء سيء يحدث بحياتنا يكون سيء فقط
فلا بد أن هناك شيئاً ما مبهج بداخله ولكننا لا ندري كنهه لوجود ما
يتعبنا..
وأيضاً كل شيء سارٌّ ومُبْهَج يحدث لنا يكون معه أيضاً ما هو سيء
ولكننا لا نتذوق إلا الشيء السار
والسار فقط..

وكأننا لم نأت إلى هذه الحياة إلا لنتجرع مرارة فراق من نحب ..

إن جرح القلب هو خطيئة أكبر من القتل أحياناً، فحين يُجرح قلب
أحدهم يفقد أى معنى للحياة،
فلا هو حى تدب فيه مظاهر الحياة، ولا هو ميت سلبه الموت تلك
الروح الجريحة،
أنه يسعى تائهاً في ذلك البرزخ بين الاثنين،
ضائع يبحث عن ذاته،
يحاول التماسك واستعادة نفسه من جديد،
وحين يقرر العودة إلى الحياة فإنه لا يعود كما هو وإنما يعود وقد
فقد الشعور بالأمان،
فقد الثقة في كل شيء حتى نفسه،
يشعر دائماً وكأن كل موقف يمر به هو محاولة أخرى لإيذائه،
يثور ويغضب لأتفه الأسباب دون أن يدري من حوله أنهم ربما مسوا
جرحه الذى لم يبرأ دون قصد ولا علم منهم، يضحك ويتعاش
فيظن الناس أنه قد برأ من جرحه
الذى يظل نازفاً أبداً يؤلم صاحبه كلما مسته الذكرى.

كل واحد مننا بيعدي عليه وقت يتمني ياخذ راحه سنتين كده أو
تلاتة..

مش محتاج غير انه يريح اعصابه..
وينسي كل حاجه حصلت له السنين اللي فاتت..
يعمل ريستارت لحياته..
يلغي ناس من قاموسه..
يعالج اخطاء كارثيه..
يعيد تخطيط حياته من أول وجديد ..
يراجع أهدافه وأحلامه من تاني ..
يمارس هوايته اللي نسيها في زحمة الحياة ..
يبعد عن صراعات الحياة اللي طحنته ..
يرتاح من التوتر والضغوط في سباق الدنب اللي ما بترحمش ..
يعيد ترتيب الناس في حياته من جديد..
كل واحد فينا بيبقى محتاج ..
شويه هدوء وراحه..

وبس....

نبذة عن الكاتب

عمرو محمد مرزوق

كاتب وروائي مصرى من مواليد محافظة الغربية ومقيم بالقاهرة
ومن إصداراته المطبوعه

- أناشيد الموت، إصدار دار اكتب ٢٠١٤
 - ميدوم، إصدار دار نون ٢٠١٥
 - شامبالا، إصدار دار نون ٢٠١٦
 - الكابوس، إصدار دار نون ٢٠١٧
 - نساء فى التاريخ اصدار دار زين ٢٠١٨
 - سي أوزير اصدار دار نون ٢١٠٨
 - دقائق العاشره اصدار دار ادباء ٠٠٠٢ مجموعه قصصيه
 - السر المفقود اصدار دار نون ٢٠١٩
 - وبيقي العشق اصدار دار السعيد ٢٠١٨
 - العهد نوفيلا من اصدار سلسله الارشيف لدار نون ٢٠١٩
 - صباحكم بلا وجع دار السعيد ٢٠٢٠
 - عفار دار نون ٢٠٢٠
- للتواصل مع الكاتب الحساب الشخصى..

<https://www.facebook.com/amr.m.marzouk>

صفحة الكاتب على الجود ريترز باسم : عمرو مرزوق
البيدج الأدبي للكاتب على الفيس باسم : عمرو م. مرزوق

